



08211

內分拾壹種

永嘉善果書目

瑞安孫氏詒
善祠塾開雕

永嘉叢書總目錄

橫塘集

劉左史集



薛浪語集

劉蒙川集

陳止齋集

林竹軒集

葉水心集

水心別集

開禧守城錄



集韻校正

永嘉叢書總目錄

禮記集解

李善注

尚書顧命解一卷 孫希旦



首

許景衡字少伊温州瑞安人登元祐九年進士第宣和六年召爲監察御史遷殿中侍御史是時王黼蔡攸用事景衡言尙書省比闕長官而同知樞密院亦久闕雖三公通治三省然文昌政事之本樞密本兵之地各有攸屬安可久虛其位願博採公議遴選忠賢以補政府之闕遂大忤黼意朝廷用童貫爲河東北宣撫使將北伐景衡論其貪繆不可用者數十事不報睦寇平江浙郡縣殘燬而茶鹽比較之法如故景衡奏茶鹽之法當以食之眾寡爲歲額之高下今收復之後戶版半耗民力蕭然而茶鹽比較不減於昔民欲無困得乎奏上詔兩浙江東路權免茶鹽比較賊平日仍舊朝廷旣興燕雲之師調度不繼誅求益急景衡奏財力匱乏在節用民力困弊在恤民今不急之務

橫塘集

本傳

一

若營繕諸役花石綱運其名不一吏員猥多軍額冗濫又無名功賞非常賜予皆寅緣僥倖干請無厭宜節以祖宗之制而省去之且極論和買和糴鹽法之害不報會知洋州吳巖夫以私書抵執政子道景衡之賢因從子堦符寶郎周離亨以達離亨繆以其書誤致王黼黼用是中景衡逐之欽宗卽位以左正言召旋改太常少卿兼太子諭德遷中書舍人侍御史李光正言程瑀以鯁亮忤執政斥景衡爲辨白坐落職予祠高宗卽位以給事中召旣至除御史中丞宗澤爲東京畱守言者附黃潛善等多攻其短欲逐去之景衡奏曰臣自浙渡淮以至行在聞澤之爲尹威名政事卓然過人雖不識其人竊用欽慕臣以爲去冬京城內有赤心爲國如澤等數輩其禍變未至如是之酷今若較其小短不顧盡忠徇國之節則不恕己甚且開封宗

廟社稷所在苟欲罷澤別遣畱守不識縉紳中威名政事
有加於澤者乎疏入上大悟封以示澤澤乃安杭州叛卒
陳通作亂權浙西提刑趙叔近招降之請授以官景衡曰
官吏無罪而受誅叛卒有罪而蒙賞賞罰倒置莫此爲甚
卒奏罷之除尙書右丞有大政事必請問極論潛善伯彥
以景衡異已共排沮之或言正二月之交乃太一正遷之
日宜於禁中設壇望拜高宗以問景衡曰修德愛民天自
降福何迎拜太一之有初李綱議建都以關中爲上南陽
次之建康爲下綱既相遂主南陽之議景衡爲中丞奏南
陽無險阻且密邇盜賊漕運不繼不若建康天險可據請
定計巡幸潛善等傾綱使去南陽之議遂格至是謀報金
人攻河陽汜水景衡又奏請南幸建康已而有詔還京罷
景衡爲資政殿大學士提舉杭州洞霄宮至瓜州得暍疾

橫塘集

本傳

二

及京口卒年五十七謚忠簡景衡得程頤之學志慮忠純
議論不與時俯仰建炎初李綱議幸南陽宗澤請還京景
衡乃請幸建康黃潛善等素惡其異已暨車駕駐揚州休
於傳聞不得已下還京之詔遂借渡江之議罪之斥逐而
死既沒高宗思之曰朕自卽位以來執政忠直遇事敢言
惟許景衡詔賜景衡家温州官舍一區

橫塘集二十卷 永樂大典本

宋許景衡撰景衡字少伊温州瑞安人登元祐九年進士宣和中召爲監察御史遷殿中侍御史欽宗卽位以左正言召累遷中書舍人高宗朝至尙書右丞罷爲資政殿大學士提舉洞霄宮卒謚忠簡事蹟具宋史本傳景衡雖源出洛學而立身剛直不與賈易諸人鬻爭門戶其文章亦坦白光明粹然一出於正在徽宗時卽極言財力匱乏請罷花石綱運爲王黼所中而去及從高宗在揚州又與黃潛善不協借渡江之議斥逐而死雖阨於權倖屢起屢躓而終始不撓今集中所存奏議如論童貫悞國辨宗澤無過論王安石當自便論議謹案集中無論王安石劄子而有論王安中自便劄子乃因王安中

橫塘集 提要

安置象州有指揮放令逐便景衡因論列安中罪狀謂不當許令自便此疑當作論王安中不當自便謹附詞之乞寬恤東南諸劄子皆誠懇摯切詳明於此

其他亦多關係家國大計雖當時不能盡用其說而史稱旣沒之後高宗每念其遇事敢言追思不置亦足見其忠愛之忱有以感孚於平素也至其詩篇乃吐言清拔不露伉厲之氣如玉樽浮蟻一樣白青眼與山相對橫諸句殊饒風調胡仔漁隱叢話謂寇準詩含思淒婉富於音情殊不類其爲人今景衡亦然蓋詩本性情義存比興固不必定爲濂洛風雅之派而後謂之正人也宋史藝文志載橫塘集三十卷書錄解題亦同自明以來傳本久絕今從永樂大典中採掇哀綴以次排纂釐爲二十卷朱子語錄嘗稱陳少陽事其詳見許右丞哀詞中今已不睹是篇則鉅

製鴻裁佚者不少其幸而存者彌宜寶貴矣

橫塘集提要

二

宋

許景衡

撰

五言古詩

題海山亭懷左經臣詩

去年登斯亭江山照尊俎眼中十年舊一笑便爾汝今年
登斯亭春風糝花絮故人渺天末雲海滯鱗羽尺素相濡
沫耿耿不我與壁間指舊題珠玉暗塵土良辰豈易得陳
迹空處所眷言繼高韻寸縷慚織組嘉我二三子肴核佐
玉醕歡然爲傾倒落日爭起舞丈夫貴適意窮達付出處
洛陽眞小兒顧慕涕如雨江流無日夜而此獨不去何須
數歲月俯仰亦今古

食筍

山中春物早霏紅亂桃杏霜筠固自如挺立萬夫整蟄雷

橫塘集卷一

一

走狂鞭迸地驚脫穎鮮華競時節露籜含朝景山家窘口
腹擷摘盡畦町林間忽斑斑一笑脫愁境呼兒且朝飯縹
緲度雲嶺海犀紛縱橫荆玉燦光炯士生得所適藜藿過
五鼎膏粱誰不飽去去多僥倖

康師見訪於竹閣因師臣師同賦問訊元老人

道人樂巖栖泉石厭眼耳胡爲一葉舟汎汎西湖水應憐
老居士巾履一作屨困塵滓相從一笑頌茗盃浮雲蘂江天

正搖落秋色淡如洗宴坐俯層軒梢雲森鳳尾眷言東溪
老挺立萬夫偉平生海潮音卷舌付諸子維此岑遂師道
學究終始當年幾酬對萬法一彈指要當出新句特用問
興止江河有餘潤今我亦隨喜

贈袁州仰山簡長老

簡師本吾儒學佛見閭奧開心滌塵滓回首棄巾帽飄飄

秋雲意凜凜霜柏操魚鼓屢陪眾林壑常寄傲十年棲仰
山終日勤化導欲酌清冷泉爲爾沃炎燥欲揮智慧劍戒
爾逞貪暴迷途自多梗法岸豈易到惟知務引拔仰不愧
覆幬幽明雖難詰善否疑有報巖間湧寶塔茲事誰爲造
琢削甯須班挽拽誰困畀一方競奔走萬口盡喧噪守臣
獻異狀天子錫嘉號鎮壓等衡岳扶持壯大寶師乎良有
得叟也無復道

鄉會詩錢晉臣和韻謝之

流落湖海間十載苦卑溼生還亦何事猶未掃餘習天葩
發新句珠履追舊集和篇紛四來文采各熒熠轟鉉金石
動淒楚風雨急土風自難忘豈比南冠繫英英王者後文
武盛爵邑清深如古井短綆未易汲如何示同好醉墨猶
我及年來窮到底屋壁徒四立此行亦何幸珠玉得屢挹

橫塘集卷一

二

騏驎委六轡萬里無險澀他年乘高車何人猶戴笠

登清勝堂呈長兄

幽居在山腰斯堂近山頂松竹瑣陰翳軒窗闕光炯先生
爲題榜醉墨重九鼎登臨屬秋半搖落江山迴獨鳥點晴
空斜陽亂帆影相將舉網去鳴榔盡漁艇含情寫毫端羞
澀對清景卻憶初來時積雪照高嶺餘香舞寒梅芳意萌
野杏英英座中客玉樹凌風並天涯歎淪落誰使脫陷穿
愴然撫陳迹曉夢驚初醒年來飽經事百念欲灰冷君恩
等山嶽此意猶耿耿何當伸報效萬一免罪肯杖履時往
來壺觴欲酌酌樊籠戢鴻鵠末俗多蛙黽此心端不謬餘
生亦可幸但恐主人曠塵沙汗異境

朱君文拉遊淨明寺因迓張宰詩

火雲湧晴空矗矗盡奇巘午汗麾白雨俯仰無從遁招提

據高岡萬木森，偃蹇涼飈落水雪。爽籟發絲管，朱侯真好事。十里過南坂，憐我墮深甑。相將振餘喘，欄干俯屈曲。巾履容跣袒，風苗翠浪翻。海嶼青螺遠，兀茲接尊酒。笑語傾懷惘，浮雲識醉歌。彩羽驚檀板，新涼知幾日。已覺秋風轉，事業愧初心。明時羞冗散，主人勤使事。睽闊心不展，雙鳧歸未歸。紅日林梢晚。

還自南邑潮過不及渡因宿江上書所見

漫刺辭主人，遲遲駕短轅。郭外人煙晚，雞犬自啾喧。客事足俯仰，世塗多險艱。行役亦云勞，未抵浪拘纏。潮汐真無情，斂去如絕絃。解衣試槃礴，旅鴈方聯翩。天末線縷動，鉦鼓俄闐闐。稍看黃金盤，吞吐洪濤間。欻然洲渚失，浩蕩連雲天。平生喜江海，豈但眼界寬。飄流二十載，齷齪百憂煎。今夕復何夕，玉壺俯人寰。造物雖汝厄，甯不畧汝憐。清風一帆去，鼓枻餘高眠。佳處良在茲，疇昔勞永歎。

橫塘集卷一

三

成正仲水鄉秋興寄王履道惠然見示以此謝之

九河赴滄溟，奔放日洶洶。霖霖作秋潦，散漫失邱壠。孤城臨絕島，狂瀾驚四擁。鳧鷖散凌亂，蛟鰐似矜寵。微茫天勢平，蕩搖坤軸動。田家栽一麥，秋稼泥沙壅。何能憂卒歲，迫此朝夕恐。孤生寄卑溼，五斗安聞茸。飽聞達人觀，未作窮途慟。稍令裨危隄，運土紛接踵。河伯聊戲劇，爾輩嗟倥傯。成侯北方秀，筆力千鈞重。新詩試模寫，氣奮洪濤湧。英英幕下郎，伋伋山西種。何當一交鋒，我亦願助勇。

龍華馬鋪懷廬行之去年邂逅

去年南邑歸，春風拂征轡。相從一笑頃，花卉方斌媚。歲月俯仰間，還到經行地。壁間舊詩句，塵土日蒙闕。老境牽俗累，節物搖鄉思。歸歟悵何時，與子同此味。浮雲有南北，况

乃爲祿仕置之勿復論一醉了春事

道樂安寄楊縣丞時可

猶蘭出眾草歲晚不可採幽幽澗底松獨立色不改成都
有雲昆達識我所駭形骸判土木軒冕那能免端懷三釜
養尙贊百里宰人方笑渠聳我獨悲眾賸經行閭闔里指
迹紛穉艾愛之不可見暮色生寒靄一區已有宅三徑可
無待他年歸去來垂白看戲綵林園日成趣雞犬亦自在
回看是非場蠻觸誰勝敗收身要閒健肯坐老病悔我亦
釣橫塘相望渺雲海

寄左四十

小左眞奇才童穉已穎悟讀書一十年胸臆日充饒時時
吐所有落筆不肯住長江吞巨壑白日破昏霧雄辭何縱
橫妙理爭發露驕驕始汗血萬里猶頃步嗟嗟駑駘輩安

黃塘集卷一

四

用苦猜妬而我何爲者江海久飄寓得子糊人中磊落眞
瑜璠文章豈易工識者尤難遇哀絃有三歎要非俗所諭
往還幾歲月會面輒忘去蕭條抱膝吟浩蕩登高賦迷途
子所憐正我欲一作路到處我觀古人文何曾事章句至音
本澹泊太羹異九具君看桃李花紛紛競春莫終焉適眾
口了不在紅素子兮更深探吾言亦其粗

寄左與言

時與家府君遊天台

我公厭紛華早歲謝羈束卜居山水間山水長在目巉巖
吹臺高艷艷橫塘淥興來卽杖履一作屨往往混樵牧別來

二三載獲鶴悵幽獨歸心日搖搖夢繞湖山曲兒曹眞罪

人志養非所欲雷連州縣問折腰食斗粟世途苦多礙公
心亦煩蹙眷言慰公者蕭散惟林麓謝屐齒已蠟陶巾酒
初漉結束山家具提攜倩童僕遙知入山去野飯久不肉

相見石橋側觸眼驚寒瀑殷勤清淨供煮茗媚乾竺瓊底亦薄相聊以眩聾俗桃谿仙洞府流水花翩翩二子去已久蟠桃知幾熟弔古一慨然新詩定相屬英英太沖後壑壑崑山玉干言揮灑頃紙上龍蛇伏聯鑣得所適山路忘重復我亦箇中人簿領方驅逐遙望白雲飛此心尤躑躅羨子好心事愧我祇眼餽人生行樂耳險澀戒川陸千金不垂堂萬里虞脫軸歡罷念歸旋無食華頂宿

引泉示吳甥

淙淙玉溪泉曲折西亭隅飛流自噴薄白石淨如鋪雖無渌井禽亦有針頭魚豈知江河寬嘸沫自相濡况此五六月萬物在洪鑪而我弄清淺瑣碎珠玉俱泉今且勿流止此爲我娛一出澗谷去人間供百需清者鑿鬚眉濁者混泥塗江湖尙或爾而況溝與渠寄語山中所養當何如

橫塘集卷一

五

浮屠二首

浮屠有冲衍少小已雋偉身雖束異教性實嗜書史千言揮灑頃妙語如飈水嗟嗟靜閣中斯人今已矣成象有至行旣冠逃浮圖與遊何其多一一士夫夫毛髮不及鬚破衲常如如軒檻已陳迹來者猶嗟吁

小圓石屏

微風激寒波浩浩皺紋縠連山夾脩徑約畧露寒木何人琢山骨拂拭温如玉蒼蒼碧月樣入手不盈掬此生隨萬物何者斯爲足要須指顧間一寄千里目

石屏

嗟我官永甯天台祇兼驛如何三過雁未省一投屐豈無謫仙夢蕭散到泉石亦有山中詩淋漓堆醉墨當時巧酬唱二左名藉藉戴子爾何爲十載名山客自言石橋下醉

耳驚霹靂石橋富子孫一一粲珪璧希微小江山妙盡丹青蹟憐我逸少徒念念眠峨適特一作此一拳許已作干峰碧我生癡鈍殺兩眼眩白黑塵埃浪奔走簿領隨戲劇何階探道要回首謝形役琴書載扁舟歸臥橫塘側天台何必到去路饒荆棘端畱石屏風種種自可識

張仲共許惠呂研因成長句

英雄舊割劇鼎業逐流水高臺亦已傾况及分香婢鱗鱗屋上瓦棄擲滿鄰里鐫窪漫兒戲後世始稱美世人攻翰墨好古惟兩耳何曾問珉玉枉卻千金市豈知疊口翁十指老泥滓追蹤千載後未易較彼此其質堅而剛其膚膩而理澄泓秋水淨慘淡暮山紫要當奴鳳唳何止友龍尾神工付黃壤人間能有幾張侯金閨彥不特河朔偉十年走澤潞百物盡糠粃惟有篋中珍左右配書史明光誰起草此獨塵埃裏嗟我方著書瓦礫著癩髓慙慙桂籍舊許輟陶泓子學問已遺俗取舍期不詭及物何可望姦諛誅既死

南監還宅

野店飯童僕駐馬亦俄頃寒日不相貸漸漸敲西嶺揮鞭上馬去驚塵蒙四境客衣已疎薄霜風作淒冷極目去路長回首烟村暝鳥雀飛棲定雞犬啾喧靜新月當馬頭疎林亂人影去去甘遠役遲遲復深省筋力疲往來歲月磨簿領雖云竊廩祿乃是蹈機奔戰粟當吏案低回傍公屏少年浪自重事業期台鼎棲棲裁一命泛泛慙飄梗窮通宜有在賦子定誰秉矢詩寄幽歎寂寞寒夜永

庚子歲作

我本山中人中年墮紛華洞庭罷香火還尋舊生涯墟曲

分耆舊問勞仍咨嗟三徑日荒蕪歸來何晚耶亦既謝父
老低頭自吟哦人生各有役倦游卽還家來者祇如許往
者知一作將奈何

憶昨

憶昨秋風時持檄走東越棘圍琪深嚴蓮塘漾空闊嘉興
二三子雄辯探理窟清尊日從容高堂俯軒豁思家資善
諱望遠嚴詩律海蚌割明瑩荆璞畧玷缺雙瞳眩丹青萬
紙疊冰雪敢辭窮日力要使駑驥別誰憐今夜裏還對中
秋月當時府空階清影數毛髮杯盤已零亂浩歌彌激烈
朋從渺湖海歲月苦飄忽窮閭撫往事驚夢誰與說清砧
送逸響寒螿共幽咽舊遊知誰在想見賓筵設冷然廣寒
宮共此白銀闕題雲滿四壁世路非一轍北軒風雨多長
恐銀鈞脫

橫塘集卷一

七

白沙驛弔辛氏

劍溪激流湍浪一作浪石森戈及劍山皆壁立小徑千盤紆

行人雖慎擇何者爲夷塗我行岳灘上短亭臨路隅詩榜

紛四壁共傷辛氏姝辛氏罷會稽歸舟攜一作挈妻孥奔濤

觸巨石十掌一息俎唯公倚傲蓬脫命顛沛餘泥沙汙玉

質波瀾漾羅襦草木爲慘淡鷗鳧亦驚呼嬌魂逐流水散

漫何所如遺骸不盡獲亦有葬江魚千金不垂堂覆轍戒

後車爾死今四紀曾無復淪胥是身等浮雲變滅只斯須

在物苟有益甯辭死非辜沈江恥讒國人皆哭三閭殺身

以成仁聖言良不誣溺死豈爾志庸知非良圖紛紛殖已

利感歎獨躊躇

和時可醇酎二首

聖賢須于鍾我豈箇中人焦枯展餘憑好我已十分元戎

鎮河朔憐此賤與貧不羨彼瀛洲已有玉膏醉小槽漪眞
珠霑餉無疎親但有坐上客誰問甌中塵豈學梁父吟何
時見陽春

勞生何擾擾百年今半塗是身等浮雲南北方自如青衫
憶初仕與公父子俱邂逅話疇昔恍恍一夢餘

潛清室

世途溷塵土道人獨潛清隱几方丈間凜然玉壺冰湖山
自拱揖風月時將迎未能役濟勝久客媿吾纓

書聽雨亭呈元老

無雨我掩耳有雨我不聞我豈忘人耶心手自紛紜老人
登斯亭聽否了不分前山忽震雷後山堆白雲

別毛德修

張公鎮關南賓客多僑偉芝蘭已秀發父子作知己聖人

橫塘集卷一

八

樂育才充庭皆濟濟仲也與計借發軔已千里毛侯東南
特清澈分激水並馳及春風聯璧驚都市麟鳳豈無種貂
蟬能有幾承家貴勳業可獨在書史自憐生樗散所學慙
簣止永懷勝己遊塵土濯清泚相從苦匆促寫別亦狂斐
離庭寒日暮日斷塵沙起

五言古詩

贈人

山陽隱君子少有高世名終身慕父母事之如平生青衫
老一命儒官談六經經行必造門懷如遇公卿虛往而實
返授業多豪英衣冠塵土間辯論江河傾吟哦千萬篇迴
與六藝并鮑謝寒蟬噪郊島蒼蠅聲先生兼眾體渾然獨
天成

贈朱深明

十年走南北委跡甘蠹蠹舊學已茫然疎慵長自哂豈知
江漢旁名士有標準高名久傾屬王事得親近可是臭味
同一笑脫畦畛華堂照犀玉覺我蝸舍窘風流跂前輩要
當攄妙蘊胡爲飯藜藿默坐師粲忍微生縻簿領與俗益
矛盾蹉跎谷口志慚愧鹿門隱百念已灰冷積習掃未盡
緒餘君勿靳迷途須汲引

橫塘集卷二

一

次韻江民表寄王聖時六首

先生脫塵屣西室八十年物態日紛紜此境長湛然問道
滿函丈孰云無世緣茫茫天地間所樂乃一屨燕坐亦何
爲柏子炷爐烟

前輩不可見吾猶及此老灑然忘鄙吝豈復歎枯槁微言
破龔瞽從之恨不早况有樛櫟年庶幾松柏操先生爲首
肯人人有吾道

我亦斯人徒鳥獸可同羣隱居豈我意褻褐老海門物理
有悟會明鏡無塵痕似聞釣臺老勸飽千里蓴豈爲飲噉
興端念父子親

諫省坐何事南遷臨嶺嶠天命已在我誰能賦鵬鳥第懷
平生友坐隔湖海杳生還桐水上尺素寓襟抱鷄黍尙可
期千載有同調

居士不溷俗已判此生閒釣臺經世志謬謬在朝端出處
固不同相對卽歡顏乖違限南北奮迅無羽翰此心目相
見未應勞永歎

天地吾一氣萬物吾一身紛紛枯一體末學蔽多聞二老
獨超然早以德爲鄰昭昭此心理千古無故新奇聲發妙
蘊一視世間人

次韻王經國

人生皆有役我亦事川塗崎嶇蕩兀中此境常晏如永懷
賢令尹出處與道俱起予亦多矣詩句乃其餘

次韻鄭希仲

橫塘集卷二

二

周詩三百篇強半出憤激少陵嗣眞作千載無匹敵嗟我
亦何爲苦心等蓮萸平時一千首棄擲隨瓦礫朝墮不成
雨安用橫天霓吾僚一何妙筆下飛霹靂青天與白日奴
隸皆知覲况是箇中人固應厭飢怒入幕盛紅蓮不才慚
敬櫟勉哉攄婉畫稚弱安紡績

次韻姚伯遇

從事慚非才日覺有不如丐閒得祠館回首謝榮途古來
陋巷人飲水樂有餘利市與名節二者常難俱

無題

功名等戲劇俗眼自驚詫詩酒有真味多應知者寡嘗聞
歐陽子風月本無價今我貧到骨懸磬比居舍就使一錢
直在我已不暇故知造化意特用相慰藉

李伯時畫陶淵明其猶子遺余作此謝之

斯人今何在古冢號寒木簡編漫遺言風采不可復龍眼
真偉人千載識高躅神交入心匠醉墨爛盈幅蕭然出塵
意豈獨舊眉目仲容還好事故收拾珍笥憤世人渾未見惠
然投我欲乘田元不恥折腰亦何辱行藏固有在今昔豈
余獨新詩第甲乙三徑森松菊少陵曾未知浪疑公避俗
我生癡鈍殺野性等麋鹿長恐探道淺輕比抵鵲玉人生
適意耳何苦自羈束低頭拜公像塵土方碌碌

過新息

新息臨通衢赤白分棟宇古息眇村墟相望十里許我行
屬馳駟枉道不可去弔古獨踟躕指以示田父傷哉彼美
人國破爲人虜驚魂慄風葉暗泣泣花露一死重太山亦
或輕一羽猶能子元辯獨爾悄無語舊屋空頽垣草木日
繁蕪悠悠清淮水千古亦東注

橫塘集卷二

三

東郊

東郊過新雨野色何氛氳嘉苗起萎病萬頃堆寒雲田父
揖行客苦訴村墟貧年年夏旱時赤地流黃塵小兒困鋤
耘烈日背欲皴大兒斡水車手足無完筋官租且不供矧
欲養吾身東隣久無烟幾口能生存西隣逐熟去今作何
鄉人行客謝老農艱難困勞塵而今新官家寬大布深仁
大臣亦端良乘時轉鴻鈞汝豈不自覺新歲雨澤勻寰區
日寧靖百物方訢訢爾曹死亦足及爲太平民

次韻酬胡元賓

天地一逆旅此行適同塗等是驅馳人何者不爲如一念
有忻厭慷慨顧羸餘安得如吾子不與世俗俱

和楊時可贈吳子厚

吳子守西河疆敵能遠遁功名豈不偉事親有遺恨雲孫

亦何爲總髮能自奮論兵得家法絕域屢得雋三釜乃吾志九遷何足論一朝棄官去悍卒亦驚歎官長欲挽畱歸塗已強半皇天照忠孝爵祿亦如願彼師乃曾子棄擲一置等仇怨子從何人遊卓爾有獨見父子今一處甘旨應手辦垂垂對黃髮衍衍日歡宴客來爲從容觴豆無早晏古今入商略亦有一笑粲人皆贈渠詩素壁供揮翰吾丞豈眞聾尙缺此一段君親恩彌重報效不可緩始終能自勉高義薄雲漢

冬至日雪

烈風鼓青冥陰雲布崢嶸不待珠霞集忽驚玉花傾一陽動黃宮萬物如有萌豐年頌上瑞我獨欣發生永夜不能寐耿耿書窗明

仲煥雪中見過因畱小酌

橫塘集卷二

四

陽復日雖長歲暮氣猶慘馬曹糜管庫兀坐長戰領豈無紅氍毹欲取終不敢亦有兵廚酒隻指弗容染蹉跎爲祿仕黽勉從吏檢一作儉晨趨析毫分暮色俄黯黮天公復衍巧六出紛如糝自慚非安道誰肯泛清刻慙慙絳帳客竹輿甘頓撼可是乘興來正坐憐塲坎駝褐點白玉烏帽從風颭長衢得迴駕寒光照肝膽濕薪噓白煙孤燈裊紅燄荒齋聊一笑俗境洗瑕厲江梅寫春意粉面誰妝點疎影落清樽勸人傾漱醴念君齊魯秀文字垂琬琰俛首江漢間爲人作模範府中多豪雋淥水浮菡萏珍烹窮水陸何獨嗜昌歎仁聖今在御威柄方親攬君看盈尺瑞端自天心感太平容冗散萬一逃汰貶追隨有餘日相與樂閒淡人生隨所遇何者爲夷險要當反自味豈特嘗橄欖

去年冬至過閩清再至有感

曉昨初寓宿黃宮萌一陽今我復來思節物老春光濃陰
付梅杏青實久已嘗翳翳軒窗日幾線如許長蜂兒飽儲
蜜燕子已巢梁吏役祇擾擾何術補民瘡學古要施設及
時當自強光陰俯仰過老矣徒慨慷挺挺彼蒼官生來傲
冰霜端然閱榮謝未覺歲月忙

七言古詩

和王魯公掌中大華

五嶽獨說太華雄屹嶭千仞撐青穹何人收卷入掌握要
使肉眼驚神通懸巖絕壑濺飛瀑玉牕翠壁開深宮先生
捧玩豈徒爾崇卑真妄歸圓融我生江海會未識幽邃崎
嶽煩指蹤堪笑騎驢老潘閔卻要三峰在眼中

次韵楊時可戲高潛翁

青衫白馬佳公子山東豪俊知名氏平生青雲期自至倉

橫塘集卷二

五

庾一官聊復爾丞公家風繼伯起笑渠颺糠兩眼眯乘田
委吏古不恥端恐前言戲之耳

送僧之石梁

萬卉流芳不知春力巖畔澗下蹙紅皴碧乘興復誰同孤
蹤遠讎敵君不見五百聖者道雄機靈峯晦盲深無極寒
山老寒山老隨沉迹迢迢此去須尋覓花落花開獨望時
記取白雲抱幽石

江邊行

江邊煮鹽女日墾沙中土間道潮乾土有花肩負爭先汗
如雨經年鬻鹽赴官市屋裏藜羹淡如水誰家滋味盡入
珍猫狗食餘隨帚塵

和長門怨

長門沉沉人悄悄滿庭紅葉驚秋早窗底銀缸祇自明卻

聞別院按歌聲飛花滿地君恩去覆水返瓶君或悟人生
離合自有時多應不在相如賦

調同舍

播穀子播穀子爾休苦苦催春耕勸農使者無一語嗟爾
聒聒知誰聽提葫蘆提葫蘆荒年有酒無人酤先生年來
一不飲花前愧爾情渠渠杜鵑流血思歸去百舌從來巧
言語紛紛隨意作春聲夢入鈞天聽韶濩先生避俗厭煩
喧竹底誅茆常閉戶蒼苔滿徑人迹稀嗟子胡爲肯同住
聲名盡道男子事窗下誰知讀書苦燈花落也作罷休早
取商量君聽取

故人惠馬生筆

聞說江南多筆工馬生所作尤瓌異十年江海得妙旨一
日聲名傾眾技故人憐我有書癖數管不辭千里寄齊鋒

橫塘集卷二

六

出穎雖不殊酒墨虛心皆已智當年退之傳毛穎假辭託
說終傷僞我今草草又百載矯首相望空兩地文房四子
迭有無商沒參橫似相避鼠鬚栗尾乃見嫌強欲用之隨
棄置馬筆端如故人面眼瞥見時心已記跳龍臥虎非世
習縮蛇縈蚓皆兒戲豈知遠適在加鞭卻傲良工先利器
何當拂衣隱林麓約史著書從素志敢言名姓垂竹帛自
甘生死惟文字敬謝故人因及馬梳毫截管惟精緻而今
勁健已不售要須軟熟隨人意

靜堂爲弼上人題

浮屠西來如轉郵方袍紛紛劇東甌上人維弼志獨憂脩
然高舉異凡儔從師渡淮沂隋溝神都歲月俄十周燕坐
縹緲雲中樓明窗翰墨冰繭柔貴人旁午擁軒騶問汝亦
有所欲不此身南北眞浮浮黃金白壁誰能收乃獨汲汲

從英遊乞書覽字無時休千年金石窮雕鏤上劇鍾王下
虞歐糝糊墨本如山邱精神散漫不可求俗人貴耳賤兩
眸今人古意豈不侔森然玉筍垂銀鈞怒猊渴驥蟠靈湫
錦囊象軸光油油自笑長物猶見畱幡然忽憶江湖秋瓶
錫東下如輕鷗誅茆伐木寒岩陬名堂以靜蓋有由坐觀
蠢蠢遍九州長空浮雲水中漚眼前何曾無應酬嵐光波
影相夷猶別來書札屢相投問我何時泛扁舟西峯玉泉
深且幽杖藜來往亦風流紅塵道路方悠悠回首東南天
盡頭

渡淮

我觀淮之源東行已千里扁舟一日下長淮似與故人相
見喜不知渡越幾澗谷清澈尙爾無泥滓澹然端肯與我
俱試問故人能有幾蕩雲沃日窮眼界茫茫真與天相似
橫塘集卷二 七

萬艘絡繹鼓風蒲翳翳塵飛明鏡裏况聞水伯時惡劇雷
擊風掀浪山起豈知生處極幽深清淺涓涓一泓爾吾聞
古來養心者擴而充之亦如此自慙學問太迂疎十載不
離畦井底潢汙斷港何足道所得未能充口耳忽驚浩浩
東傾海會令百川皆遠指君看厚地一撮土本來也是無
多予人間萬事須自強嗟我蹉跎今老矣

和左與言謝寄酒

君不見梅子真當年狂歌吳市門神仙隱逸兩何有耿介
感激空千言我今幸生太平日千載相望同祿秩閉看世
事渾不知一心祇願飢腸實有誰解與魯公米無田也釀
淵明秫甕間細酌新潏醅既醉歡娛亦蕭瑟江湖誰肯便
相望一尊猶及詩人嘗榴花竹葉應撥去落棗且看鴉兒
黃高齋肆筵盡嘉客長鯨一吸無餘瀝座上杯盤未狼藉

愁見長瓶臥東壁新詩飄飄寫胸臆青天白日飛霹靂休
言李杜門限窄到底輸我巧鑽刺我詩杉雞竹兔耳未見
虎狼先辟易異時更敢說較量縮手從今作降敵

謝韓用可和記夢詩

嘗聞歐陽子自許一世豪及得梅老蟠桃詩畏彼松栢臨
蓬蒿歛然欲以怪自戲新句遠繼愈與郊嗟我後來亦何
爲敬誦遺墨徒嘈嘈有時援筆學模寫矯首但覺嵩衡高
宣城無人穎尾空百年歲月何寥寥那知吏部有孫子年
少力學精風騷前日記夢屬我韻筆墨奔放欲與二子爭
秋毫秦盆楚筑未覺陋鏘然入耳驚咸韶昔我一官向天
台春風洞府生碧桃簡書坐束寸步不能到落花流水空
迢迢羨君幽夢得所適一飽便覺忘葷臊要尋蘇后評濟
深豈學劉阮迷妖燒百年擾擾一夢耳更較長短論昏朝
不如吟詩飲美酒從他世事如牛毛

橫塘集卷二

八

按田南鄉夜過翁嶺

斗祿折腰方自勉敢嘆塵沙長滿眼平田細路苦縈紆盡
日肩輿在香篆簿書告辦裁知返落日在山路遠荆榛
蔽塞虎縱橫僮僕相呼無處避山下人家早閉門疎籬燈
火自黃昏杯盤四座還相語猶有行人過別村

贈五台妙空師

山僧棲在山之顛胡爲振錫來市廛且言自得相形術願
與多士談媼妍津塗窮通可逆數名分巨細潛開先龐眉
合享壽考福鼎角堪持丞弼權人生肖貌雖若爾天理應
效非皆然條侯餓死始難必裴度果相終何緣亨衢第以
直道致吉祉多爲陰功延操修向善或向惡感召凶吉如
蹄筌予觀傳記考物理謂師語議非無傳出言少偷信不

免受玉苟情知難全况乎素行未中積敢以虛表要諸天
富哉荀卿騁雄辯推本心術深磨研九州功崇夏禹跳三
面德至成湯偏仲尼何長子弓短古今無害爲聖賢林宗
知人出明性清澈鑒裁猶澄淵大端亦貴器與識規矩安
可私方圓君平卜筮達至理探索造化窮推遷與臣言忠
子言孝利害之際尤拳拳古人術學務原本寧將浮說相
拘攣羨師通論近名教爲師條列終吾篇

康師贈臣閣黎次韻

樂天西湖誇竹閣寂寞百年風隕籀師今燕坐最勝處脩
然日誦山中樂富貴易致閒難得造物畀渠良不薄老康
遊戲作偈言使我惛悵心茫然

趙持志出先公文炳所藏蘆鴈

當年公子身通侯錦衣玉食天上游騎龍日日朝北斗豈

橫塘集卷二

九

識萬里江湖秋但聞人說蘆葦傍枯荷翻倒風颼颼四天
墨黑雪欲落羣雁上下聲咿啾坐嗟上界足官府十年高
閣空雙眸豈無詩句強模寫曉夢不到寒江頭何人筆墨
能得巧活脫所見來神州高堂素壁試披拂

拂一作拭

已覺身

在蘆花洲嗟嗟江海人兀兀一葉舟烟蓑雨笠不自好風
雪橫來翻百憂豈知公子曾未見縑素髯千金酬人生
萬事適意耳過眼起滅皆浮漚玉函置壁誇謹密流落道
路知誰收公子好畫豈云爾要使萬物供冥搜至今好句
在人口秦華突兀黃河流嗟我後來亦作詩辭慳意鄙勞
雕鏤願起公子已死中論詩觀畫一洗千古愁

橫塘集卷三

宋 許景衡 撰

五言律詩

張元光生日

闊步雲霄去當年屬意深感時雖白髮許國尙丹心顧我
無才思登門怯醉吟誰能將壽酒滿滿爲公斟

寄欽師

亭障臨燕塞江山復楚鄉艱難悲客路宴坐憶禪房燒盡
蒲花燭清餘柏木香十年如夢覺兩鬢自蒼蒼

還自肅寧晚色可愛寄盧行之

送客關城外回鞭驛路長風烟無限好簿領底能忙平野
破寒木紅塵烘夕陽新詩巧模寫最憶幕中郎

信步

橫塘集卷三

一

信步春風遠田家暮景遲亂畦還有徑疎竹自成籬雞犬
皆豐歲漁樵獨此時年年看節物鬢髮欲絲垂

招隱堂

僧家樂幽獨世路自塵埃丈室何人到重門盡日開石泓
泉滴漚竹徑月徘徊多謝相招意江湖歸去來

次韻彥崇遊三洞

兩溪尋勝處三洞得偕行澗外雲猶濕山深谷應聲畱連
看龍躍來往計牛鳴回首林間寺疎鐘報晚晴

送翁修撰

天上曾三接人間第一流雲章頒召節錦里送行舟急雨
千山暮迴風五月初紅旗猶可識賓吏滿江頭

端午

節序重重過京華物物新安排黍生角妝點艾爲神窮衙

無來客他鄉有故人揮毫非楚些誰與巾靈均

九日

青女飛霜重黃花挹露鮮伊人今已矣節物獨依然撫事
眞疑夢登高淚迸泉關河重回首烟草夕陽天

九日追懷叔父兄長登高

殊方復嘉節對酒重悲嗟逝水人何處荒籬菊自花南樓
秋色遠西嶺夕陽斜舊日登高處於今定幾家

送黃元賓還鄉

寄語黃夫子而今正好行麥秋最涼冷梅雨半陰晴客路
空形役鄉山獨眼明偏親應更喜少婦好家聲

送世厚還鄉

世厚忠簡子

斷續黃梅雨清涼小麥秋謫官猶逆旅送汝上歸舟松菊
宜勤種簞瓢善自謀餘生須付託可但鹿門遊

橫塘集卷三

二

過西岑泛湖而歸呈左經臣

畱連不覺久蕭寺足清風短棹平湖裏孤城落照中朝廷
尙多難身世轉飄蓬安得言分散清尊豈易同

呈呂幾仲

曾作河陽客春來花滿城曉風吹玉勒殘月落金觥天末
傷離索京華忽會并琵琶雙鳳翅耳冷十年聲

別黃巖

問我黃山尉無才亦可知頻修謝罪啓祇作送人詩壠畝
豐登外山林寇盜衰會無慰父老別後莫相思

奉酬胡文贈別

蹇淺時何取跼蹉歲又陰田園歸去計事業老來心好句
頰相屬離愁自不禁松江分手處烟水暮沉沉

春晚

行樂連三月漁樵亦醉吟桑麻須日力花絮識春深飄泊
驚時變文章信陸沉故園渺天末無限欲歸心

和經臣晚春

蝶散花猶在鴉藏柳已陰敢遲連日醉恐負懽春心金縷
休頻唱瑤箴正苦吟獨慙詩學淺三嘆豈知音

伯氏

伯氏古豪士何曾與俗同酒狂天地外詩句笑談中池水
添新綠林花著舊紅向來多樂事天末任漂蓬

早渡浙江

官舟憐逐客鳴艣破驚湍露氣橫江白秋風送曉寒平生
獨往願今日上恩寬漸近嚴家瀨擡頭覓釣竿

晚行

脈脈多愁思栖栖復晚行路回村更遠林邃客頻驚宿鳥

橫塘集卷三

三

非無處歸雲自有情鄉關悵何許天際暮山橫

松門詩

竹橋兼程去松門百里餘荒林疑獸伏窮海異人居山擁
波濤急沙輕步履虛來因王事耳此外敢躊躇

送從姪邦直丞長溪

阮舍淹丞屬閩山得雋髦詩書能自立州縣豈徒勞迂拙
從吾老飛騰看爾曹祇應記岑寂尺素到江皋

示世隆

問訊吾家姪題詩寄此情遺孤猶小在聰慧乞憐生祖母
今年老門風待汝成須知疎懶叔早晚欲歸耕

吹臺

聞說吹臺上秋來鏤薜蘿白雲長自在幽徑復誰過天末
空愁眼尊前且浩歌山林與廊廟二者竟如何

種樹

幽谷青青樹移根倩爾栽祇疑荆棘地不稱棟梁材豈爲
歲寒改稍看春色回清陰惟海國回首思悠哉

翁行簡挽詩

學舍賢師友年家老弟兄分符渺淮楚傾蓋憶都城白雪
千篇在黃梁一夢驚承家今有子未覺負平生

趙敦禮見招小飲投壺明日南去

瀟洒賢公子閒邀病客俱青燈初照席彩箭已盈壺隆準
眞龍種清聲想鳳雛扁舟明發處應記夢華胥

挽劉太君詩二首

婉婉宜家早孳孳執禮勤事姑俱白髮看子上青雲飛旒
隋河路新阡慎水漬哀榮兩殊絕州里未前聞

配德樂邱園承家屬後昆千鍾豈榮耀一笑爲平反庭樹

橫塘集卷三

四

悲風慘霜天落月昏斑衣已陳迹補袞看忠言

次經臣見寄之韻

召節來金闕扁舟望石門家山秋渺渺烟水暮昏昏竟失
臨分語徒傷遠別魂慙慙謝池月相對宿江村

次韻周共叔五首

問學探前聖聲名自妙年何疑待價玉卻計買山錢北極
雲垂地西江水接天扁舟如有約吾亦賦歸田

黃卷開三館紅塵又幾年病多須藥物旅寓費囊錢舊學
寧無意斯文祇任天軒軒千里鶴可但戲芝田

鄉國兵戈息仍聞大有年欲尋江上宅預辦酒家錢好句
煩招隱餘生且樂天向來眞可笑舍己別耘田

賜環初就日弛擔又逾年老矣懷三徑歸歟有幾錢報君
慚犬馬戀闕望雲天但得鄰顏巷寧論負郭田

鄰並端如約追隨可判年稻梁富茂魚蟹不論錢春到
花開處霜餘橘熟天清尊長嘯傲滄海半桑田

次韵王功達見寄

烏府參風憲鰾生負德音投閒雖白首體國尚丹心天上
浮雲散江邊秋色深第知歌擊壤寧復賦愁霖

次韵陳仲山見寄

風雨江湖夢衣裳京洛塵人生皆物役海內豈吾貧丈室
雖多病鄰翁或可親杖藜元有約會見往來頻

次韵似之運使奉呈左經臣兄二首

江海閒來久篇章老更新蒿萊猶自飽天地豈無貧舊友
今持節諸郎亦可人應憐未歸客白首尙紅塵

泊膽他年大詩名近世無山林多避寇里巷笑爲儒老去
慵開眼秋來欲染鬚涼風千萬里的的爲南圖

橫塘集卷三

五

寄許樂清冲甫

入竹空陳迹經行憶歲除舊遊誰更在逸興近何如樹密
鷺聲遠江寒雁影疎樓頭紅日晚徙倚獨躊躇

曾汝器既別奉寄

憶在西齋日斯文得細論別離空歲月飄泊任乾坤把酒
餘風味看雲各淚痕扁舟獨歸處烟水暮昏昏

戚之

余與汝器皆有哭弟

寄張德祥

細草碧侵池幽花亦滿枝羣生俱有德造物定誰私故國
春將暮他鄉日自遲論文一樽酒何路得追隨

寄竹閣臣師

鹿苑西湖上烏臺北斗旁塵沙空自老雲外定相望林麓
餘秋色郊原半夕陽惟應閣前竹凜凜帶新霜

寄沈亨老

時在京師

京國三千里人來慰所思遙知爲客好何似在家時春日
鸞鳳去秋風鴻雁悲衣裳慈母線亦恐汝歸遲

寄薛十七巨源

茅屋西山曲攜書喜見過別離驚歲月淹泊奈時何末俗
皆浮誕斯文肯琢磨後生餘力在吾意已蹉跎

寄錢子勉

花縣逢迎日琴堂宴坐頻簿書時有暇燈火夜相親世系
皆王澤官曹獨海濱政成飛鳥去念別一傷神

寄題張學士三徑堂二首

留侯有高致世業更誰傳蒼雪新開徑蓬瀛舊集仙藜牀
陰松桂蕙帳帶雲烟擾擾爭毫末何人解樂全

我欲尋三徑長歌歸去來未能似夫子還是走塵埃彩筆

橫塘集卷三

六

臨流賦清樽對菊開披榛往來處東望思悠悠

縱目軒詩

眞人已仙去釋子在高岑暮色江山遠春風草木深何人
與題咏今我亦登臨縱目皆云爾誰知有縱心

行役詩

行役無時節春來又幾時柳條隨處處梅蘂亦枝枝弱質
曾無取斯文祇自宜眼邊新物色駐馬暮江湄

石泉小軒

泉到碧岩腹茲焉復小渠泓澄元有在漑濯乃其餘孤迹
寄江海三年困簿書閒來俯清淺感歎獨踟躕

土山驛詩

在永靜軍界
時被檄濱川

渺渺指蒼海行行過漢陵衣裳千里雪鞍馬九河冰寓宿
適有處悲歌自不勝平生少遊語耿耿對寒燈

晚晴

南州苦卑濕梅熟復何如老夫歎巾屨稚子在泥塗新月
出天末微涼生雨餘陶公入州府此興與誰俱

天街經暑雨烏府絕塵氛躍馬人皆散新蟬我獨聞風生
初罷扇日轉漸無雲寄語同時客清涼尚可分

駐馬詩

駐馬長河曲穿林小徑斜猶能尋隱逸可是厭泥沙軒冕
雖無意田園尚有涯何時策筇竹隨意到山家

無題

台奴初學語丹子已能行問叔今何處嗔爺太懶生會令
主門戶豈復意功名坐對江湖晚橫塘舟自橫

野外

野外連荒草樓頭正夕陽凭欄空遠目何處是吾鄉王粲

橫塘集卷三

七

從軍樂少陵羈旅傷男兒知底事出處兩難忘

宿僧房

捕逐雖王事經行亦自強艤舟當海島宿得僧房絕境
三山在清風一水長此生空物役回首意茫茫

夜過杜家村

駐馬問村老卻言行未遲路雖十里遠月到四更時我去
良有役子眠寧負期人生隨意好冷笑一題詩

送師顏致康深道入京

二子今西去贈言聊爾規勉哉精素業行矣仕明時破臘
梅先蘂含春柳欲絲江邊人散後帆影漸參差

上章倅二首

海內名聞从江邊歲復葺美才由世濟清節畏人知郡國
已無事朝廷方有爲會參鴻雁序歸去鳳凰池

簿領勤官府聲名振士林雖云心尚在自覺力難任歲月
淹多病江山入苦吟高堂昔三嘆亦恐負知音

遠意

遠意誠難問狂歌自不禁花光春灼灼月色夜沉沉簡冊
終何事江湖獨此心野禽多意緒飛集近寒林

橫塘

好在橫塘水人今去幾年秋光空到地霽色自連天伐石
圍高岸誅茅駕短椽歸歟此心在何苦利名牽

節物詩

江水西風急江天作暝陰鄉園猶在眼節物莫驚心是處
皆秋穫誰家急暮砧薄遊嬾妻子飄蕩到而今

聞子瞻南遷

隴蜀崎嶇外華夷間望中黑頭方世用青眼忽途窮遂作

橫塘集卷三

八

天涯客何如塞上翁幽愁還有作笑殺贊皇公

賀人祖父生辰

青春嘉誕日八十渭川師林下有真樂人間無愧辭松栢
看舞鶴荷葉隱巢龜賴有榮孫子藍袍薦壽厄

贈吳子思

花縣初相見清樽日笑歌交情論厚薄客路自蹉跎歷歷
功名意駸駸歲月多豈知同夜宿還問命如何

贈姚儀甫

年少開千卷生涯祇一瓢聲名動場屋意氣在雲霄素髮
今垂領青衫尚折腰未應輕斗祿吏隱本逍遙

贈張承老

永裕躬神武開邊絕漢西雖云擁貔虎猶未斬鯨鯢吾子
名家後當年訓士齊天涯思往事回首祇悽悽

題壽聖院

古寺重門裏回廊一徑幽水聲長帶雨山色最宜秋寓宿
已多日題詩更少畱此生隨利祿行路日悠悠

寄題葉希聖申亭

燕處厭紛華穿林一徑斜層巒開水墨古木走龍蛇事業
雖無補田園尙有涯何時策筇竹隨意到山家
每向新亭去何曾問主人弟兄俱有好樽俎自相親棲翼
雲山晚飛花洞府春長愁醉歸處步步近紅塵

孫大夫絕塵亭詩

丈人樂高曠閱世等樊籠池館重城外塵沙一笑空紅蕖
新過雨脩竹自生風未必全違俗杯盞與客同

池上

十里西城去春風水拍堤畫船簾幕動別殿筦絃齊勿覺

橫塘集卷三

九

仙山遠相將醉路迷紅塵競回首斜日杏花西

螢

不知何處出牢落水村邊隱猶含雨飛飛欲近船詩書
看老矣事業尙茫然今夕知何夕蓬窗猶未眠

去國

詩書元有志耕養苦無田去國何爲者題詩獨慨然廟堂
修政事郡國奏豐年五斗雖云薄餘生得醉眠

升之兄見訪竹閣

飛蓋山城外尋幽鹿苑中層軒不受暑脩竹自生風江海
多年別杯盤一笑同平湖吞晚照歸棹惜匆匆

寄題會文閣

劉子天台去君今幾代孫山居多水石客至亦琴樽簿領
嗟淹泊詩書失討論何當謝羈束杖策過層軒

亞叟惠臘粥次韵

飛瑄迎長候香糜入臘新交情最憐客節物獨驚人雲意
安排雪梅花告報春病中疎酒棧兀坐惜芳辰

再和

河南聞譽久漢上定交新遺粥聊容俗題詩更可人歸期
恨不早旅思卻逢春他日從誰餉長懷臘八辰

邱隱夫傳神

曹霸逢佳士慇懃爲寫真今君仍妙筆一作手顧我獨何人
軒冕曾無意功名敢問津會須添杖屨卻作自由身

挽左司江公

前輩風流遠惟公尙復存此心無限量所得有淵源眷獎
深宸展聲名重諫垣平生經世志已矣復何言

橫塘集卷三

十

暮雲合釣臺秋水深向來遊歷處千載只如今

憲府叨新渥京華會卜居迂疎慙瑣瑣許與獨渠渠醜唱
看遺墨漂零送轉車他年桐水上雪涕更躊躇

樓朝議挽辭

金閨早通籍銀兔屢分符文采傾簪笏諷謔足袴襦聯榮
看子舍從養亦神都八十終天祿朋儕更有無

東南獨耆德湖海老門生未厭遺簪舊頻煩倒屣迎音容
忽冥漢歲月又崢嶸夢入鄞江路依稀晚柝聲

送吳師常

吳君久羈旅所至卽爲家傾倒賢人酒浮遊仙客槎此身
惟願健萬事儘從他聞說令歸矣田園亦有涯

送蕭德宏

孤嶼何時別雙溪累月留父兄安契闊序序得優游宿霧

散初日春風乘去舟好看清汴水渺渺帶伊流

送李季成

花入新年好傳觴日倚欄故人從此別春色更誰看洒落
餘篇翰芬芳識蕙蘭片帆天際晚回首獨江干

送李忠彥

畱滯嗟爲客而今始據鞍梅花春信早星斗夜堂寒此別
十分飲何時一笑歡勞生強半在見晚不須歎

送德祥四首

借杜子美首句

天上張公子河間善最多三年種桃李萬室自絃歌北闕
今歸去斯民奈別何會將清禁月千里照嘉禾

縣之西堂

天上張公子同時桂籍人江湖嗟迹遠關塞獨情親鴻鵠
寧無志驂驪已絕塵音書憐舊好別後莫辭頻

好去張公子依然別後深霜清風撼撼野曠馬駸駸奕世

橫塘集卷二

十一

皆榮問連枝復好音青雲多意緒寧復故人心

好去張公子離歌盡一尊朝廷方北顧父老惜南轅禦侮
從先志招攜亦舊恩須君對宣室爲我折羣言

挽元僧正

物外孤高客人間九十春遠朋多有道學子略成塵仙嶺
浮雲散寒潭夜月新孤生長感愴先友更何人

景城雜詩八首

井邑遺孤壘漁樵尙幾家洪河散陵谷古塚入桑麻燕子
初經節蜂兒幾報衙此生天地內隨處是生涯

故園豈不好卑官良爲貧驅馳萬里去憔悴九河濱亂水
纔通野幽花已繡春天公渾不惜乞與作詩人

藜藿晨昏外詩書寤寐間百年皆物役五斗愧身閒暖日
花爭發春風雁欲還杖藜俯清淺蕭颯鬢毛斑

誰道邊城遠春風也自來啞啞林鳥嚙細碎野花開日壓
初晨霧龍驚昨夜雷郊原閒駐馬極日絕纖埃

燕趙當南北關河獨鬱盤時平無戾氣歲間有春寒仰祿
家千里題詩思萬端危樓多晚照倚徧小闌干

冰雪初消凍關河已見春民居樂豐歲吏隱是閒人黃水
魚偏美青帘酒亦醇吾生如有計五斗未爲貧

任夫人挽詞 宋國保母

榮養方南國安輿更北轍從容對孫子聞問及平反無復
承顏樂猶餘在耳言會看墳上柏千尺倚高原

寄兄長

江上分攜日樽前聽我歌安居是非少遊宦別離多陋巷
從顏子斯文續孟軻平生端有意嘆息自蹉跎

寄三十九兄

橫塘集卷三

十一

伊昔初分袂于今幾度秋鷓行慙北闕雁序憶南洲湖海
誰招隱塵沙獨倦游平生一樽酒好在謝公樓

次韵兄長見示二首

拜命辭南國攜孥客上京塵沙驚老眼江海夢歸程醜酒
誰思我看雲賴有兄遙知倚欄嘯天闊暮潮平

此境本無塵端居更可人林園稍成趣風月轉相親暇日
已卜築他年待乞身絕勝貪夢好臨老種松筠

翁老過邑

百里絃歌地別來俄至今江山已陳迹桃李漫餘陰白髮
心猶壯清歌酒屢斟何妨鎮還往眷眷吏民心

酬盧行之

緣分冰片碎金拂柳絲長臘雪猶含凍春風何太忙會看
鷺出谷不羨雁隨陽誰憶江梅發風流入米郎

次陳語

程褐驅羸馬依然寒氣清春風官柳細紅日雪泥深藹藹
多佳氣飛飛亦好音寧辭去家遠魏闕舊馳心

款某大理墳

丹筆持平久清時屬望深誰憐一抔土長負百年心舊友
多高誼諸郎亦好音獨慚門下客流落但悲吟

姨母薛夫人挽詞

不獨相君子仍聞教子功安輿四方外色養百年終隴畝
惟先樹江湖獨轉蓬凋零驚母黨涕淚落秋風

趙表姪出先德彥章詩卷

晚路嗟流落長時任鬱陶故人今地下新句出兒曹野潤
春風早霜清夜月高杯盤舊行樂江水日滔滔

和陳澤民見寄

橫塘集卷三

十三

涉世真堪笑論交愧未忘先生已高遁賤子向他鄉簿領
三年夢塵沙兩鬢霜扁舟歸未得春水滿橫塘

逗曉

逗曉復籃輿平田細路迂村墟元閨寂籬落更蕭疎吠犬
行隨客癡童喚覩渠從來喜澗朴况復野人居

海上

江闊渾無際潮平更不流魚龍方鼓躍鳧鴨共沉浮別岸
多雲樹斜陽一釣舟蓬萊如可到當與子同遊

和左經臣移居

暑往衣仍葛秋來甌尚塵北宮尤養勇東郭故安貧去國
經時久臨江卜築新未能供祿米愧爾少陵人

五言排律

王義夫召飯鼇山亭詩

海上聞三島人間占幾州孤城臨鳥道雄構壓鼇頭縹緲
層軒外縈紆一徑幽鳴琴常有暇飛蓋許同遊平野連天
闊洪河遶塞流清風驅酷暑畏日得新秋麥破銀絲淨茶
烹玉蘂浮官聯慙蹇淺恩紀獨稠繆牢落登高賦驅馳爲
食謀從公時晤語不復歎淹留

寄劉元禮

東郡趨鋒召西廡振羽儀微言元自得夫子更誰師文物
今爲盛賢能眾不遺秋風看鵬鷺碧海盡蛟螭妙選追前
輩高標照一時綵衣供戲樂絳帳欲歸遲念昔羣居盛論
文非我私艱難良自信出處不無疑騏驥方千里鶴鶴但
一枝田園日牢落浩蕩故山期

宋

許景衡

撰

七言律詩

平沙閣呈陳古田

畫棟朱欄壓水涯，稍看劍石欲平沙。
虹梁突兀幾千尺，雲屋陵嶒一萬家。
袞袞公侯應日起，紛紛桃李競春華。
雙鳧自合朝天去，饒與銀河八月槎。

送董公權入洛

蹉過名園百五期，眼前穀雨未爲遲。
好麾席上鐵如意，拚醉花前金屈卮。
塵土毋辭久行役，簿書何計得追隨。
河南耆老俱冥寞，試問如今更有誰。

獻王祠

有釣魚臺

列國提封倚樂亭，九河分處見孤城。
池臺釣罷人何在，邱

橫塘集卷四

一

壠春來草自生，遺像丹青皆舊物。
斯民簫鼓漫新聲，誰能特表平生事。
祝史從官得幣牲。

寄新茶王聖時蒙示五詩

建溪初採雪芽香，病客分來敢獨嘗。
一盃聊爲金粟供，五篇不學玉川狂。
風雷有信猶嫌晚，草木無情也著忙。
誰似山中老松柏，不知人世有炎涼。

贈夏倅

九華直上參雲漢，秀氣由來出搢紳。
聞道賢良歸盛族，故應文彩繼前塵。
春風醴酒年年好，月色燈花處處新。
他日傳柑向雙闕，還思曾醉慎江濱。

和左與言

貧病年來謝還往，交親書問可相聞。
如何舊好懷天末，猶及新詩寄海濱。
吾子叔孫盡成籍，主人兄弟亦機雲。
羣居

猶有游從樂官况淒涼獨廣文

和酬張敏叔

東嘉匕箸琢紅玉北苑枿芽模紫金野人何知敢持餉詩
老發興爲高吟松江蓴鱸有家世吳宮風月無古今飯稻
煮茗窮勝覽紛紛市朝塵土深

再和張敏叔

畱連五斗未投閒獨坐窮愁有萬般多謝題詩相慰藉應
憐涉世最艱難載聞詩老推工部何止神童說長官我亦
半生收好句夜光偏照篋中寒

再和敏叔二首

弱冠曾攀桂一枝半生爲國理勞絲高吟直到古人處勇
退宜爲世俗師杖履訪僧長過晚茶瓜畱客固應遲黃山
遊舊今能幾詩社猶忻小子隨

橫塘集卷四

二

固知島可是詩奴何況區區杜與吳舉世徒能循覆轍先
生今爲翦繁蕪淵明松菊還堪賦白傅園池亦有圖莫把
五湖都占了也須畱與故人俱

和董適道

十載江湖早得名未饒淮海獨孫登揮毫落紙才無敵傾
蓋論交喜不勝休問喧嘩多燕雀須知變化有鯢鵬青雲
步步前頭去卻莫低飛似我能

和張子壽二首

紅紫紛紛盡鬪妍遊蜂舞蝶亦翩翩一年純是愁閒事三
月過來幾醉眠生怕楊花飛似雪忽驚荷葉大如錢詩人
只解尋佳句分付春愁與少年

風雨朝來不甚顛殘花贏得更畱連簾櫳寂寂鶯方乳桑
柘陰陰蠶欲眠老杜只將花作伴孝先偏與睡相便江湖

漱澷皆香水好在橫塘舊釣船

改葬西山延仲主簿特賜慶什次韵

改卜西山痛更深新塋松柏未成林三牲不待平時養再
命何勝永慕心泉壤多應增喜氣隴雲還爲結愁陰褒稱
重辱新詩句拜德渾如早歲霖

三月十九日同亨仲按樂大晟

聞道鶯花滿上林尋芳誰更畏霖霖鳴鳩乳燕春欲晚去
馬來牛泥自深出火星壇方肇祀聯鑣樂府按新音浴浴
九陌皆流水撩動平生江海心

辰火舊無祭今創舉

除夕別仲煥

並轡不嫌車馬塵肯教節物惱行人殘年氣候消磨盡來
日風光陡覺新我已襄陽訪耆舊君方郢國和陽春雖然
不作多時別懷古知誰意氣親

橫塘集卷四

三

和唐知府宗博

學省當年假佩紳誰知家世有功臣朝班長憶傾鷓鴣海
角俱欣識鳳麟坐撫斯民雖有道細看此境本無塵自憐
馬老猶迷路邂逅何妨一問津

了無聲價繼三豪敢嘆崎嶇世路勞綸閣文書慚潤色琳
宮香火想烹蒿餽鵬變化誰能料燕雀飛翻自不高松竹
雖無三徑在長歌歸去也如陶

再用前韵

得賢一語可書紳妙選由來屬世臣千里方能辨駑驥四
靈安可後龜麟共看再造恢王業肯使中原雜戰塵聞有
王都近消息眉間喜氣已津津

異禮多應得雋豪病夫深愧館人勞初欣秩秩陪賓席卻
憶呦呦賦野蒿春草池塘還得句霜天鵬鶚定飛高也知

野客多閒散丹竈松風獨訪陶

寄家兄

斗祿驅馳驚歲晚世途齟齬奈時何也知犬馬皆能養自
恨田園苦不多兒女近來渾長浪弟兄何事尙奔波橫塘
卜築今應好試問頻頻理釣蓑

會餘慶

山城動是三年別古寺今陪半日閒簿領嗟余多眊矚道
途憐子亦閒關並遊天上皆英俊幾個汀邊肯往還莫惜
一尊相伴醉已將毛髮等邱山

休師惠詩次韵

也知寸木可高岑肯負平生學古心王事曾無絲粟補鬢
毛已覺雪霜侵寓畱古寺聊登覽喜有高僧與對吟更憶
仙山最深處巖前小雨弄晴陰

橫塘集卷四

四

贈仁上人

飽聽長蘆江水聲歸看蒼雪更分明故人應嘆遽如許慈
母翻愁太瘦生邂逅艤舟同一笑登臨懷古亦多情髯張
好句新拈得恰好而今送子行敏叔有送僧云別後遙知倚門母老來偏憶出家兒

宿靈峯贈總持大師

記得曾爲鳳林客高僧住處最深幽幾千里外重攜手三
十年間一轉頭霜葉乍驚風撼撼雲堂相對夜悠悠去畱
聚散元無著自笑多情更刻舟

寄康師

好在仙巖康上人從來心事許誰親品題泉石詩無敵吞
吐烟霞筆有神聞道弟兄皆妙質要當談笑繼前塵箇中
况有東溪老行處何妨更問津

寄仙巖元上人

龍穴梅潭抱嶺斜，憶會同試雨前茶。稍須林壑開雲葉，便倩兒童汲井花。一別仙山空夢寐，五年邊塞走塵沙。會須覓片閒田地，鄰舍如儂有幾家。

送持後過越

永嘉竹閣談空相，自是僧中第一流。盡放衲僧來聽講，也容禪子不相謀。二林三峽曾經耳，萬壑千巖試舉頭。提取淨瓶涓滴許，有時散作五湖秋。

聽師邀入山

學道無成亦可憐，紛紛膏火自熬煎。似聞沽酒邀元亮，故敢移書問大顛。州縣徒勞輸此日，雲山高臥或他年。須知二老風流在，賞遍西枝月更圓。

虞仲訪僧正見招，以詩屬函歸不及。往依韻和報兼

簡康休二上人

橫塘集卷四

五

東溪自是老林師，千偈瀾翻獨此時。盡判百家無好句，故教二子亦能詩。逢迎蠟屐應班草，奔走芒屨愧采芝。多謝相招，故人意更慚妙韻，繼前思。

題舒氏覽秀樓詩

遶屋青山羅髻鬟，小樓幽勝可躋攀。不論空翠烟霏處，盡在軒窗几研間。眼淨更無黃土眯，身輕曾伴白雲閒。他年定作還鄉計，倘與親朋一扣關。

戴夫人挽詞

詩書歷歷教鄉隣，甘旨熙熙八十春。盡道先生真孝子，故知賢行屬夫人。繡帷一訣三年後，柏壟孤墳數尺新。剪綵種萱今已矣，多應處處有遺塵。

傅夫人陳氏挽詞

婉婉名家早結褵，伯鸞初怪嫁時衣。半生已覺人間夢，九

死猶知俗習非日永春風漾蘋藻夜寒霜月落庭闈稽山
會葬人歸後千古蒼官守翠微

柯運判修試院

當年龍閣帥閩中闕館興賢特地雄還見芝蘭修世職固
知斧藻有家風堂堂劍佩瞻遺像袞袞簪紳出泮宮勸學
一門眞盛事西州何獨美文翁

寄台守劉襲明都講二首

江入章安波浪寒仙山縹緲在江干二千石是誰爲守三
十年前好長官聞道漁樵安里社從教風月落杯盤新詩
別後知多少更借鄰翁洗眼看

薰然和氣破春寒見說專城冠越干訟牒不勞揮翰手歡
謠好付採詩官獨慙聖世人三黜誰怕仙山路九盤但得
白頭長健在莫辭青眼重相看

橫塘集卷四

六

送連子友守淮安二首

古來江漢最風流何況分符得顯州落日淮源香泛泛含
春沁水綠悠悠兩岐實有豐年瑞五袴行聞載路謳大觀
督郵誰見憶蕭蕭華髮對滄洲

憶昨銀袍試廣庭桂科同日拜恩榮幾千里外相逢處三
十年間一夢驚隼旆光華仍遠別多冠流落獨含情清淮
東下饒雙鯉江海何妨數寄聲

送何亭老出守泰州

海陵人說毘陵好太守當年迴不羣新命而今分竹去歡
謠何似隔江聞簿書幕下人誰任尊俎樓頭客自醺千騎
固應知體國古來賦畝不忘君

張敏叔守梓州

風月關心自不閒詩家本領更多般千篇要繼杜陵後萬

里寧辭蜀道難今日赤帷新刺史幾年錦帳舊郎官莫嫌
白首功名晚松柏從來耐歲寒

護國寺詩

未暇遠尋廬阜遊只消護國也深幽種蓮惠遠誰還往得
酒淵明自獻酬惡句多慙居唱首高吟長許作遨頭請看
十八人同社盡是人間第一流

小詩聊記鳳凰

東國詩續集作山

遊髣髴東林水石幽已愧高僧

與摹刻更煩諸老數賡酬簿書底事長遮眼林壑何人

東國

詩續集作會談

肯轉頭會待從公白蓮社杖藜來往亦風流

次韻馮吉老

馬蹄長壓軟紅塵欲去虛名意亦欣壯士寧爲東閣客故
人休誦北山文到家畱語應如鶴出岫無心恐似雲我亦
有田江海曲年來舍己爲誰菽

橫塘集卷四

七

次韻盧彥升

同場名輩敢爭鋒想見當年賦詠工冉冉星霜今欲老拳
拳畎畝獨懷忠羊腸已失千重險鵬翼方看萬里風應笑
長安徒索米不知鼯鼠技將窮

次韻陳季修

絲衣初寄水邊村學子紛紛已滿門聞道詩書多旨趣固
知師友有淵源聲名在子那能掩志業如余豈足論應笑
倦飛歸已晚結廬閑徑近雲根

次韻經臣見贈

邊陲無事故喧爭惆悵中陳失太平天上風霜方鼓動人
間草木已欣榮共懷前日手齡遇誰使蒙塵萬里行淚眼
時時望滄海百川渺渺嚮東傾

過敏叔次韻

花縣曾聯令宰裾神都今喜沒階趨青雲羽翼看一鶚秋
水精神識二雛歷覽何如少陵集新詩便是梓州圖狂吟
大膽誰知我敢向龍門捋虎須

是日見東川唱和
景物皆少陵陳迹

和趙承之春日

土牛喚起打春人休向東郊更深春未說風光十分好且
看節物一番新田園自省非無意簿領誰知尙爲貧關塞
塵沙長滿眼橫塘冰破碧鱗鱗

寄內

離家不道多時別在路俄驚兩月闌漫有傳筒將委曲祇
容書歷報平安文園雖得相從樂明月長思一處看早晚
征鞍過天姥寄聲草草具杯盤

橫山閣

一笑樓頭屬晚晴我曹此樂最難名玉樽浮蟻一樣白青

橫塘集卷四

八

眼與山相對橫笛裏風流終古在世間榮利過雲輕未應
暮色催歸思天外娟娟新月生

趙虞仲過仙巖以詩見寄答之

十年歸夢在江湖今日南飛塞雁孤已覺登臨多感慨固
應吟咏轉荒蕪近聞仙嶺尋先友亦有詩筒及老夫還許
追隨白蓮社橫塘今已結茅廬

借韻

焚香盞帳中酷似梅花

江南臘雪不到地六出枝頭也逼真萬里塞垣從簿領五
年驛使絕音塵誰知斗帳回殘夢卻有爐烟作早春草木
無情聊假合謝他知有箇中人

次韵戴禹功父子遊靈隱

聞道飛來太怪生薄遊聊與問山名陔羅布影於中好篤
樛飄香分外清猿在僧呼雖舊事鶴鳴子和亦真情晚來

歸路還瀟灑，裊裊青烟十里城。伽藍羅木間有至中國者。

再和戴堯卿遊靈隱

雲房相與話浮生，此樂須知未易名。釋子命題良有自，老人琢句得能清。倚天樓殿三吳勝，落日湖山萬古情。詩社若容追故事，未饒五字有長城。

甲辰春作

香火祠堂卽隱淪，誰知未許作閒人。一拋夜雨橫塘宿，三見東風石液春。當宁照臨齊日月，餘生報効絕涓塵。尙寬九死憐多病，乞與江湖自在身。

和胡繼道傷春

遊車輾輾不停輪，紅日遲遲展得春。莫問年光催老速，且看風月逐時新。新田園未信無來客，雲水從今願卜隣。預想漁村往還處，野航何止兩三人。

橫塘集卷四

九

上時相壽五首

閒看暖律幾時回，已覺陰雲四面開。萬物定知春色近，三台今引歲星來。競拈彩筆題詩句，端爲蒼生祝壽杯。師保從來周召事，直須兩兩位公槐。

年年燕喜倍光榮，蘭玉稱觴滿相庭。信宿尙餘元夜月，上白卻是老人星。包荒度量伴河嶽，蓋世功名在典刑。一語堪爲我公壽，聖賢相與合千齡。

清淨端爲物外仙，經綸猶有世間緣。坐令四海渾無事，付與羣生大有年。南極老人今日見，西樓明月夜來圓。吾君萬壽公同德，綠髮朱顏照冕蟬。

槐庭三入妙經綸，百度分明又一新。上欲無爲成至治，天教難老爲斯民。川塗蕩蕩初消凍，草木欣欣各自春。誰信塵埃尙羈旅，四年企首望洪鈞。

上帝分明憫下民，挺生賢傑在斯辰。
蓮花葉上青髯老，萱草堂前豔蕖春。
盡閱摺紳歸藻鑑，頻教動植入陶鈞。
古今多少調羹手，獨見緇衣有世臣。

寄敏叔寺簿詩

海角紛紛祇簿書，朅來不覺一年餘。
自嗟擾擾無休息，猶及匆匆問起居。
前日先生官獨冷，而今主簿意何如。
應隣小女猶癡在，只喜腰間已佩魚。
敏叔時爲太常簿，新改服色。

賀生日詩

慶系來從沁水園，勳門婦德眾稱難。
舊聞孟母無欺語，新得嫦娥不老丹。
行見綵衣添袞繡，更饒文砌擁芝蘭。
卻須剩種黃金菊，畱待年年獻壽看。

德起惠酒

橫塘今作小塘居，齋几蕭然一卷書。
心事蹉跎嗟老矣，天

橫塘集卷四

十

涯流落念歸歎，尙煩親好頻攜酒。
多謝園人日餉蔬，此境從來無遠近。
祇應在處是吾廬。

韋尉畫孫倅寶冠山圖

問著蠟屐到何處，眞在寶冠山上頭。
碧澗坐來元灑落，彩毫畫得便風流。
公方得志人問世，我亦長思物外遊。
一幅須尋好束緇，閒人亭畔倩韋侯。

送仲煥入穎詩

好箇石城無分到，問君此去意如何。
一江春水竹葉酒，萬點青山佛髻螺。
聞道楚宮俱泯滅，祇應郢邑亦疑訛。
直須索酒圖經看，莫只聽他白雪歌。

送西京宗博林茂南赴烏程

才名自昔等三張，閱駿無人似九方。
金谷園中辭綺席，水晶宮裏奏清商。
割雞正好師言偃，歌鳳多應笑楚狂。
未信

江湖畱得住凌雲頭角老昂藏

敏叔浮梁詩有放教明月上扁舟之句因成小詩

幾年浪作紅塵客明月扁舟不自隨忽得浮梁好詩句卻
思望柱舊家時烟蓑雨笠多應在利徑名場兩不知曾有
功成身退日不煩猿鶴怨歸遲

望柱在橫塘之側亦地名也

與言敘己卯之別

放逐歸來梅子真江邊無限送行人千鍾桑落開新釀十
里梅花正早春邂逅喜君方蒞仕經過嗟我倍思親驚回
十二年前夢陳迹依然淚滿巾

兄長省試下第還鄉以不及顧拊景衡於此情見於

詩謹次韻

江邊送我赴瀛州

一作洲

風物蕭蕭又見秋百歲能禁幾回

別此生已是十年愁塞鴻自覺東南遠汴水誰教日夜流

橫塘集卷四

十一

淚濕西風知有寄塵沙漠漠漫回頭

送剛巽還鄉

問君謁告還鄉曲來往途程得幾時莫怪杯盤能草草只
緣行李弗遲遲路從雁蕩靈山好秋入鴈原草樹衰京國
艱難同旅食而今莫遣老人知

剛巽舊與兄包蒙同在京師今剛巽歸爲其葬耳

次韵戴禹功遊淨梵退居

泮宮人物最清修杖履時尋水石幽已聽老僧談出處更
邀逐客共廣酬浮雲過眼空千古巨浸觀身祇一漚風彼
舞雩宜有得聖門更欲與公遊

天寧節上壽紫宸退詣相國寺祝壽宴尙書省

霜天宮闕九門開共獻君王萬壽杯善祝歛來傾寶剝賜
筵還許燕中臺樂連百戲鴛鴦集花覆千官錦繡堆說與
伶倫逢此日年年長賦醉蓬萊

和陳文仲廟夢

文仲已罷科舉
忽夢預秋薦

天公眞箇解撩人不獨虛名老措紳聞道高眠閒白日也
教幽夢落紅塵此生出處元無意平日文章漫有神百歲
都來如一覺卻須嘲取自由身

乙巳八月二十九日宿內府夢過村落循溪而行間
路旁人家此云何曰士村也涉溪入山崦謂同行

曰此可賦詩因得鳩燕二句既覺足之以爲異日

之觀

杖策徐行山水間天然新句得非難鳴鳩報雨天欲曉紫
燕哺雛春尙寒物外勝遊方自適枕邊幽夢忽驚殘士村
他日尋陳迹卻記曾爲內府官

紀夢詩郭荀卿見和次韻

溪水泠泠溪上軒登臨誰道四并難當年髣髴夢仙塢今

橫塘集卷四

七

日分明在廣寒還憶鳩鳴雲色重似聞雞唱漏聲殘刻舟
已有新詩句流落何妨作外官

秋夜思家

鉤簾危坐思悠悠疎雨知人特地收明月清風孤館夜寒
砧短笛異鄉秋我生志氣誰相許何日身心得自由極目
長天山隔斷吾家不見白雲浮

七言律詩

送李仁主木場寨

塞垣人物豈尋常推擇而今屬廟堂
戚里從來有名將家聲當復振
諸郎古陂解凍千頃碧官柳驚春
一拂黃下馬也知無箇事
蓼花詩興自難忘

次韻會光叔曼縣尉

我今自笑菌生庵才讀君詩舌本甘
未暇清修齊臘入要陪游治趁春三
光叔有春風浩蕩約極知世外交從好
卻厭塵一作城中富貴酣谿老絕無名利念不謀耕鑿卽漁蠶

次韻張縣丞賀三貢士

貢籍初登郡學生海隅草木已欣榮
一鄉三秀真希闊大筆千言豈猥并
樂育從來推絳帳作新何止換丹楹
會看騰躍如夫子淡墨高高揭姓名

世綵堂

萊子斑衣祇一身未如今日劍溪濱
一門純孝非無種百歲高堂更有人
饒得雲孫千指盛知他閱世幾番新
太平佳話君休惜洗我從來兩耳塵

寄陳仲山

當年抱疾題新句老歲支離已可嗟
宦學半生渾似夢塵埃兩眼漸生花
相從杖履非無意歸去田園亦有涯
祇許刀圭振疲茶與公白首醉流霞
勞勞冉冉任年華何用逢春苦嘆嗟
但得千鍾傾竹葉不妨一笑爲桃花
麒麟莫問行天路魚蟹從今飽海涯
祇恐愛閒成痼疾卻須妙手泛丹霞

昏昏烟土客京華節物驚心祇自嗟一飽徒贛太倉粟十年不見故園花躬耕舒嘯今方決卜築橫塘尙未涯夫子元無療飢藥待從方士飯朝霞

寄張敏叔

壽春太守紫髯翁憶得當年笑語同應爲江山盡詩助更無音信問途窮簿書覩著鈴齋靜棊局拈來蠟炬紅也待去爲樽俎客卻憐身世尙漂蓬

寄吳行可

憶昨揚旌過水濱一樽燈火夜相親邊城喜有笑談頃鄉路誰知夢寐煩山驛梅花初破臘池塘草色稍回春新年持節經行處亦許孤燈續後塵

寄王經國

會陪誕節祝堯年過眼星霜歲又遷誰信江湖閒釣艇卻

橫塘集卷五

二

來霄漢聽鈞天錦筵樂事今何似蓬鬢蒼顏獨惘然還帶賜花殘照裏九衢塵土醉搖鞭

寄文通

俗流指笑漫喧喧好古初心自惘然已分平生有書癖况堪此日識碑顛萬金盡散英豪外千卷仍存六一編洗眼何時拂塵篋待將點畫較精研

寄薛克勤

高才猶佐古諸侯樽俎時時好獻酬萬物也知皆有役此身安得不言休烹鮮未覺民難治炊黍猶忻客少留會看曲臺須舊德討論文物盡從周

寄敏叔

敏叔書云日與張卿天覺唱和

匆匆候館陪歡幾疑字別去而今又幾年冠蓋由來在天上

音書還肯寄江邊也知官長多詩句未省誰人與酒錢近

日頻頻看除日諸公要路亦騰騫

寄吳鄞縣

吳郎人物最雍容不墜家聲浙水東輦寺昔曾酬雪唱道
山今獨倚秋風簿書又報三年滿梅俎何當一笑同卷盡
暮雲天更闊放教醉眼送飛鴻

舊有詩寄左與言兼呈劉元禮今因寓此仍用前韻

寄劉

東行長憶過新樓衣綵題詩贈李舟千里向歌公惠政十
年誰念我重遊雨餘三洞雲俱散水落雙溪月自留莫戀
城南好泉石斯民屬意富民侯

左崇見寄以鄭虔張籍見况

憶向棲霞宮裏宿論文獨喜子相過酒酣尙覺初心在歲
晚其如別思何官比廣文還較冷詩疑司業不爭多友生

橫塘集卷五

三

許子嘗如此更問旁人果似麼

寄左經臣

二年南邑好看誰道忘形最較難別去光陰驚倏忽春
來書信喜平安如何柳市多時住不向橫塘一笑歡節物
慳人詩興懶多應閒處凭欄干

依虞仲韻寄劉元禮

先友相從古所惇杖藜當日喜盤桓雲泉何啻千年別塵
土長懷一笑歡但掃勞心身後事何須天地掌中觀果容
憐念如前約卜築從今始苟完

李彥益過景城以詩寄之

聞說安仁過東縣卻撩梅福欲歸心畫船長是半日到秋
水而今幾尺深人散渡頭飛鷺下月明波底老龍吟一杯
相屬知何日驛路蟬聲急暮林

次韻寄盧行之三首

萬疊遙山鎖暮煙一江秋水渺連天憑欄正是滕王處下榻誰知孺子賢聞道白魚方切玉更饒黃雀正披緜一樽吟嘯無餘事說著塵埃卻可憐

莫厭喧嘩近市廛且欣空闊對江天揮毫曾不靳珠玉列罌何須問聖賢南浦西山雲漠漠夕陽芳草思絲絲飛屐遠寄京塵裏多謝星轡尙見憐

撲撲金狨嘯白煙峩峩畫閣插青天杯盤洒落有餘韻翰墨風流追昔賢遠岫長堆翠羽被晚霞碎拍臙脂絲銅章更有詩家子橫寫緒餘猶可憐

寄李聖與

李侯自是金閨客奔走人間三十年未信簿書能老我何妨詩酒自陶然江山滿眼應相助風月關心最可憐解道

橫塘集卷五

四

清波新過雨也教別乘過前篇

寄成正仲

畫繡初乘八月槎肯來一笑子真家狂吟取次還成軸戲酌無多已過花陳迹悠悠驚夢寐勞生擾擾嘆塵沙遙知高會還思我共唱江天一抹霞

寄行之

城南城北長嫌遠卜得甘泉坊裏居笑語不愁歸去晚往還可以向來疎二毛自覺身將老一別誰憐歲又除定是烏銀正忙裏怪生沒箇寄來書

問訊盧家大小僧憶渠旅思爲消凝春禽言語得能好秋水精神更乞增今日垂髫且嬉戲他年鼓翼看飛騰懸知父黨無能解頭白絲絲面有稜

寄仲山

城郭長時厭還往卻來郊外飽經過故人一別已多日春色三分今幾何山鳥無端勸沽酒林鶯取次亦能歌花邊欲作當年醉望斷東風十里坡

寄俞清老

寒棲巖谷古浮邱曾約同爲汗漫游十載光陰如夢覺半生簿領尙桴浮樓頭紅日半規晚眼裏青山萬點愁淮水悠悠從此去試憑雙鯉到揚州

寄木尉君任

江湖萍梗漫流連邂逅天涯獨慨然老去鮑昭非俊逸古來梅福是神仙一樽笑語渾如夢兩地音塵動隔年有底樓臺堪寓目平蕪千里夕陽天

寄宋國寶

問君何日過雷都想見初寒尙在塗一去塵埃事奔走歸

橫塘集卷五

五

來門巷更荒蕪聲名盡欲傾時輩貧賤今方見丈夫勉矣此生忠與孝扁舟未好問江湖

畫船重過穀城闌撞著人人問子真聞道詩書元有意莫嫌州縣尙勞神一樽何日能如約五斗而今亦爲貧關塞塵沙騎瘦馬故園花柳一番新

題葉家雙蓮亭

鴛鴦也是池中物何似芙蓉出水新獨蕊應慚今夜月羣花空占別時春恭惟陶冶歸元聖聞道丹青憶老臣更向東郊看合穎我曹今作太平人

代書寄福清王居士

前日匆匆問起居此心耿耿復何如身從驛騎三千里人在天涯八十餘自是浮雲有南北誰知明月滿空虛半生俯仰今塵土安得從容扣草廬

陳節秀才失目贈之兼簡卓羅源

何事詩翁遽失明朋遊相對淚縱橫
祇應藥石猶能療肯與風流便隔生
老去篇章方得意春歸梅柳最關情
風流密令雲孫在雪唱何妨屢寄聲

樂壽驛詩

富韓公使北
啓國書於此

迢迢古驛倚城隈使者當年幾往來
慷慨誰無致君意急難方見濟時才
自知敵氣終須懾更覺天書不浪開
堂上遺塵何處去太平父老獨徘徊

和姪邦彥登道山亭詩

縹緲三山海上洲登臨便覺壓鰲頭
風雲出沒千尋塔煙雨溟濛幾葉舟
巖巖朱顏方照日蕭蕭霜鬢獨驚秋
人間榮悴何須較且把吟牋敵酒籌

次韻黃堯翁南漪堂書事

橫塘集卷五

六

南漪勝槩壓西湖珍重瀛洲肯寓居
紅藕自欣歸賦詠杜鵑應嘆早驅除
煙收露下鳴臯鶴風定波平在藻魚
箇裏憑欄知有得絕勝閉戶病相如

敏叔除詞曹以詩二首寄之

掉卻淮南好郡章歛然馳驛對天光
有誰更草詩人詔應數從前水部郎
霄漢豈惟收舊物鬢毛每苦嘆新霜
十年尚有南昌客塵土昏昏只恁忙

趙子相逢鬪寒間一聞消息破愁顏
也知念舊心猶在頗怪題詩寄尙慳
已分低頭從簿領卻因歸夢見江山
俱依風月應長好誰似先生耐得閒

謂方彥德也俱依洞天在
台州方居其旁

送蒲秀才遊南劍兼簡上官守

十年萬事盡參差惟有騷人似有期
山水窟中爲俗吏簿書堆裏得新詩
從來好古幾成癖此去論交亦可知
安得

相從飛雨槩看他郡國大生蒼

送韓存中學士二首

郡國棠陰日日濃乘輅衣繡情匆匆秋天鵬鷄風雲外春
草池塘夢寐中聞道蓬瀛才有素肯教江海樂無窮斯民
未作北亭別使節時時過浙東
憶會共飲揚雄宅屈指而今又幾年還喜各藩陪燕俎剩
看醉墨洒吟牋風煙羃羃畱行旆鷗鷺翩翩近畫船回首
向來行樂處斷雲疎雨濕江天

赤鑿客館以清陂名堂賦詩

古渡誰教名赤鑿新堂自是面清陂何人好事能題榜今
我居先爲賦詩風靜波平人散後雲收天闊月明時可憐
此箇無窮意多少漁翁醉不知

清陂堂

橫塘集卷五

七

當年平翠看青嶂

平翠在會州黃巖

枕上長教捲畫簾今日清陂

堂裏宿寒波萬頃浸銀蟾人間好景無如此物外清遊豈
易兼富貴功名非我事尙容山水樂無厭

卽事

關河念念問歸舟秣馬翻爲楚國遊野性從來迷出處濁
醪端欲慰沉浮春風庭院花千片暝色簾櫳月一鉤看盡
天邊歸雁過悲笳三疊下城樓

景城宛在水中中央短棹飄然下渺茫早路常期泛滄海異
時誰復問瀟湘看他賈客千帆過聽盡漁翁一曲長家在
東南千萬里寒烟漠漠又斜陽

城外黃河四面流此中眞箇是瀛洲雞豚散處看漁市蘆
葦叢中認馬頭子美淒涼聊遣興賈生卑濕不無憂相過
喜得田郎子時有新詩與唱酬

次韻邦直中秋夜月

秋半風高天四垂去年曾此賞清輝素娥可愛還依舊遊
子誰知尙未歸望極星辰皆北拱興來烏鵲自南飛一磴
水調何人唱莫惜淋漓酒濕衣

初至郡

流落翻爲長樂翁也知天意憫人窮九仙巖洞寒林外千
寺樓臺落照中漸覺杯盤如里開從教言語變兒童郡人
更說明年好綠葉垂垂荔子紅

蒲秀才集臨川詩

世人集句漫紛紜吾子超然有異聞獨把長矛探虎穴不
教仙翼浪雞羣離離池上生春草藹藹江南欲暮雲喜得
安居從此始絕勝離析事虛文

尹子光惠牡丹

橫塘集卷五

人

六年不見故園花每到花時只自嗟多謝故人分國豔尙
憐羈旅惜春華芳菲仙圃烘初日冷落書窗照暮霞誰道
無情便無恨祇應也學我思家

越州孝女朱娥祠詩

十歲人家小女兒凜然高節見臨危委身甘死凶人手轉
眼猶懷大母慈天子早曾加寵賜邑官今爲立新祠若教
娥與名俱沒畏敵忘親未可知

贈張同年諸孫詩

綠髮蒙茸初著巾翁翁喚作掌中珍始知詩禮趨庭早又
見芝蘭滿院春青紫近來如拾芥文章此去不勞神塵埃
袞袞元無補應笑年家老丈人

王經國生辰

試問何時得異材斗杓插子近句來文星已作人間瑞陽

氣方從地底回何有摩挲話銅狄要看清淺半蓬萊斯民
再歲蒙休澤多少歡聲入壽杯

和張子壽晚春

東風作惡也輕佻斷送殘紅四散飄自是春愁渾未解不
堪詩句苦相撩冥濛薄霧迷歸燕料峭餘寒入做貂齋閣
但知拚一醉儘教窗雨夜蕭蕭

諸友偶賦克己以戰喻次韻酬之

聞道除戎戒不虞何須深考七家書萬全要在先謀帥多
算安能便勝予豈止邊陲臥輦鼓嘗聞俎豆薦牢蔬古來
偃武修文者會使人人有室廬

謝諸友

絕學寥寥千載餘忽驚酬唱祖前書善人今得見之矣吾
道將行命也歟滴滴寒聲消臘雪融融生意看春蔬不才

橫塘集卷五

九

聖世甘無用歸去先人有敝廬

贈敏叔二首

星郎持節厭厭馳驅解組蕭然兩鬢絲三紀聲名詩獨步五
州惠愛吏爲師裕陵松柏秋風早茂苑江山落日遲千載
赤松應更喜故人孫子也相隨
公家舊物是蓴鱸好箇歸休便入吳唯有五湖供放曠也
無三徑可荒蕪酒樽傾倒隨風月詩句流傳入畫圖烟水
悠悠來不盡高名千古與之俱

退食

退食尋常無箇事杖藜蕭散有餘歡小橋落日蓮風碧別
圃薰風荔子丹早路謀身多齟齬餘生隨意得盤桓橫塘
應笑歸來晚短艇依然倚釣灘

贈俞清老

昔我江淮幾還往聞君兄弟有聲名小軒便作陶彭澤五
字何如李少卿自說此身看老去卻慚相見太忙生何時
粗有田園計把手江邊取次行

贈鄭介夫

人笑流離自抱關天教強健老林泉回頭嶺海幾千里屈
指星霜五十年無事一樽誰與醉有時兩手自爭先也知
世上皆兒戲出處如公豈偶然

鄭公自用兩手圍碁左手勝則右手把醞飲右手勝

則左手把醞飲

贈吳惇仁

長文之孫

塵埃簿領判悠悠瘦馬尋春到海頭已是二毛侵老境尙
能一笑得英遊誰言前輩風流盡我覺名家世業優但得
此心常了了豈知州縣是淹留

贈董公權

橫塘集卷五

十

前輩風流今掃地怪君尙肯轉頭看元來自作小兒子猶
及當初老長官簡冊微言齊日月絃歌餘澤在芝蘭卻慚
江海生尤晚不得同年拜杏壇

壁山堂

在處看山多間斷經行尤喜得斯堂畫屏簇簇連千室古
壁蒼蒼遶四旁憶昨服官叨內府祇供嚴祀屬新陽天涯
寓目徒增感一覺釣天夢帝鄉

題竹閣

西岑僧舍知多少竹閣巍然鹿苑中蠟屐登臨非俗客石
床宴坐屬詩翁黃金堦砌紛紛月碧玉窗櫺細細風千里
江山應在眼狂鞭何用作深叢

又招虞仲來竹閣

一諾定須遊竹閣多時凝望出松臺祇應城市醺醺醉肯

爲詩翁特特來湖水秋來清見底
仙山雨後翠成堆欄干
供盡登臨目鷗鷺翩翩日幾回

寄張宰幾仲

往在橫塘詩酒社而今不忍重尋思
時人狂簡無如我縣
尹風流更有誰塞上塵沙多冥冥
江南梅柳正葳蕤人生
閒健須行樂莫學安仁鬢早衰

送高宰

長愛西湖無點塵樓臺倒影雜星辰
未能把釣爲閒客且
喜鳴琴有主人搖槳何妨長戴月
新隄最好是遊春何須
更說林間雉看取熙熙百里民

送李彥侯宰黃巖

委羽謂方彥德人物已先去陳迹
風流猶至今隱吏向來慚懶
散令君此去好追尋春歸山奧十里
雪霜後園林三寸金

橫塘集卷五

七

况有左生詩句好一尊端爲伴高吟

自笑當初作底官只應山水得盤桓
江樓風月傳觴後邊
塞塵沙行路難間里樵漁無失業
歲時簫鼓有餘歡十年
父老今何似爲我從頭問訊看

題雁蕩山圖

別來常憶舊躋攀好信迢迢慰病顏
多按地圖傳藥石不
煩魂夢到仙山塵沙猶在微茫處
雲水都歸指顧間看取
蕩中多少雁祗應飛倦始知還

跋亨老所藏買田帖

世間榮利等雲浮珍重先生早轉頭
要得良田供玉粒何
妨累紙洒銀鈞千金身後方爲貴
十襲公家得盡收我亦
塵埃倦遊者紫蘂二頃尙悠悠

送爲章

使君遺愛在甘棠故老于今尙未忘
稚鈍自嗟生太晚風流猶及見諸郎
鳴琴暫肯畱山縣飛鳥還同指帝鄉
回首樓前江上月夜來無故照離觴

送李彥禮

持節西陲已清切還輿北道卻盤桓
當官未覺家風遠抗疏要令邊計寬
世俗多應笑公拙我曹徒解嘆才難
但將名節爲親壽何止平反一笑歡

送廖用中

也知志業在詩書可是才高與世疎
戲綵北遊非我計督郵南去近吾廬
官田雨足秋多黍城市潮來食有魚
更誦九江長短句人間樂事得如渠

送趙仲明二首

康州之猶子

關塞相逢眼便青從容猶得問平生
高談大抵多忠義先

橫塘集卷五

七

世原來好弟兄但得朝廷收閭闕
不論文武盡功名河隄奔走非吾事
去去神京信意行

役役都來幾獻酬生憎別語攪離愁
五更門吏開魚鑰千里春風在馬頭
若見遊從出京國爲傳消息到眞州
田園未有歸來計萍梗而今已倦遊

張敏叔時守儀真

送商霖兼簡共叔

末學紛紛只自誇孔顏門戶本無遮
農工商賈皆同氣草木蟲魚是一家
我欲收心求克己公知誠意在閑邪
汝南夫子規模大歸去相從海一涯

橫塘集卷六

宋

許景衡

撰

五言絕句

宿崇國院

世塗足趨競野性惟閒散臥聞風雨聲更覺江湖遠

再宿崇國院和前韻二首

能詩老工部好鍛狂中散相望千載間未覺風流遠
羣山盡龍蟠十駕容駑散嗜酒愧陶潛過橋煩惠遠

題坡竹

勁節風霜日平生忠義心誰知身死後寸壘市千金

絕句

五載客河關塵沙滿領間扁舟下清阪眼底是淮山
笑語三關去扶持萬里歸情知是同載爲底更霑衣

江樓

江水去無邊江樓思渺然西風掛帆席一一是歸船

七言絕句

默室

寶冠題榜意已到竹閣作銘言豈多入室人人知是默誰
知个裏有傾河

送人遊天台

洞裏桃花無數開玉人不肯放春回未容梅福休官去應
怪劉郎獨自來

過寶勝哭雅師二首

鳳凰巖石最稜嶒十載重來強一登怪底眼前能寂寞年
來失卻兩詩僧

雅與外師
爲詩友

陳迹都來俯仰間空堂遺像已爛斑白雲誰道無情劇猶

向山前自往還

借蘇子美畫像呈趙君

鐵面蒼髯見舊詩人間物色轉參差君家好本煩相示要
識滄浪晚步時

過襄城三首

范忠宣
嘗爲邑

公子言歸歲月深絃歌猶自有遺音誰云故國無喬木看
取青青著作林

父老分明識長官青衫綠鬢照朱顏故知廊廟經綸意也
似鳴琴百里間

問道愛民如愛兒從教閭里作兒嬉紛紛行路皆垂白知
是當年不忍欺

題野鵲

羽物從來數易完張生妙筆更多端東山詩老今黃壤野

橫塘集卷六

二

鵲寒林忍更看

題醒心亭

醒心亭下水悠悠歸棹匆匆更少留何日飄然五湖去醉
吟還得過浮邱

春日

春日尋常醉不醒而今春日若爲情青絲織手成陳跡舉
案齊眉已隔生

梅

朔風吹雪滿長安闕越生來不識寒卻有暗香飄六出不
須借與外人看

送筍與經臣

短短犀簪尙帶泥重重書卷已參差題詩分贈君應笑何
似東坡噴飯時

再次江左司韻四絕句

平生學道竟何如，不覺垂垂兩鬢絲。
六義賴公多比興，一言猶足慰朝飢。

春風吹面立多時，此句誰知好色絲。
未許飲河同鼯鼠，只消翫味已忘飢。

玉粉盛來祇小盤，仁人覽物不徒然。
豈惟廩賜皆民力，牛磨團團轉幾千。

土木形骸付等閒，祇應飲啜亦皆然。
蒸來十裂已堪笑，何況長持飯幾千。

還自樂壽寄盧行之三絕句

漲水經春處處通，悠悠雙槳夕陽中。
誰教醉眼添詩思，不是松江萬頃紅。

順水知人欲到家，扁舟拂地過天涯。
寄聲幕下紅蓮客，穩

橫塘集卷六

三

放銀河八月槎

當年玉帳撫轅門，鞞鼓聲中十萬軍。
妙略未應隨手盡，諸郎才氣各凌雲。

行之見和再寄

大手從容靜塞塵，人間猶誦病參軍。
詩家態度公能繼，還見春空藹藹雲。

寄陳季衍父子二絕

珠霞瑤花慘暮天，亂侵酒棐洒吟牋。
須知望雪亭前客，不學袁安閉戶眠。

郊原草木盡枯荂，重霧陰雲埽不開。
騎馬擁袍何處好，梅花門外探春來。

寄望回

塞上何時謝抱關，優遊琴酒舊家山。
小橋小艇相過處，橫

徑橫塘一水間

行之席上送忠彥

客裏相看常草草酒邊一笑莫匆匆明朝各自東西去回首江山宿霧中

訪唐尉

郭外青山帶勢斜松篁深處子真家年來鉦鼓渾無事臥看殘陽映落霞

酬戴禹功聞蛙三絕詩

談經長下董生帷知有蛙鳴在曲池說似青衫來學者莫因聒聒亂心思

春來蛙黽滿陂湖勿爲繁聲便疾渠萬物爾時均長養酒灰未可信前書

水畔螢飛雨過時天涯逐客獨思歸慣聽相應昏昏月好

橫塘集卷六

四

在橫塘舊釣磯

亞叟惠龍腦菊二絕

州縣徒勞可自貽便憐三徑老莓苔拂衣未作歸來計且把黃花到處栽

正色最宜霜後見清香自是藥中珍明年把酒東籬下采采何如舊主人

再和

節過霜風袞袞來幽叢渾欲臥蒼苔故知短簿朝天去更爲淵明特地栽

長笑麕臍難作敵未饒沈水獨稱珍移根只好畱閒處不見紛紛藥市人

贈別盧行之三絕

三載相從樂有餘也知志業在詩書柳亭蘸甲分攜後更

有何人得似渠

尋常送客一樽酒醉聽離歌亦慘顏今日匆匆折楊柳高
陽關裏唱陽關

百金買得玉麒麟千里看他氣欲奔知子猶能守家法不
應騎去傍人門

贈別應仲康功二絕

多謝故人憐逐客不辭追路到吳山誰知別意添悽斷卻
送歸舟出北關

臘盡江梅未放春欲將何物贈情親端居陋巷有真樂寄
語吳門老丈人

蜡祭前一日致齋亭午風日和暖呈同舍二絕

明朝入蜡徧羣神今日風光漸可人須信少陵能體物分
明臘近已含春

橫塘集卷六

五

午枕昏昏迎好夢齋房寂寂稱幽人卻思寒夜諸公子解
作霜臺一笑春

過靈壁阻雨不得遊張園二絕

雲鎖蘭皋十畝園蒼官青士自膺門何須風雨遮來客應
怕莓苔有屐痕

當年詩酒早盤桓無數蕭蕭碧玉竿雨籜風梢如好在故
應知我轉頭看

過強氏園詩

門外遊人撥不開城陰小徑點莓苔疎枝淡蘂深深處只
有春風自往來

過朝娘墓所

夢中眉目尙分明一過空堂百感生懷抱牽衣今已矣春
風渺渺暮潮平

題光武廟

聞道三千惟一心未應百萬怕王尋可憐千載興王地城
郭摧頽樹草深

己卯元日持檄樂清界上望鴈蕩集句寄寧師

笑指蓬瀛第十洲青山歷歷水悠悠眼邊江舸何匆促寸
步教身不得遊

過天姥見敏叔畱題

尊酒都門昔解攜繡衣持節大江西卻尋十載經行地半
壁新詩手自題

宿雲洞

巖壁經春長薜蘿洞門亂石自差峩山僧祇愛雲長在不
道人間雨未多

梨花

橫塘集卷六

六

飛瓊端是張公女獨對東風無一語粉淚盈盈春欲暮看
盡天桃作紅雨

妙智院雜花盛開而邑中獨未

山城紅紫看猶藥野蝶遊蜂祇漫猜卻似此中春較早等
閒行處亦花開

試茶

此生貧與病相兼從仕居閒兩不堪莫怪年來有茶癖要
看滋味在餘甘

損軒詩

遷善宜將室欲參此軒名損亦何談古來種種無非學更
好從頭問老朋

泗州堂

投宿山房第二回壁間題字已塵埃簿書奔走渾無定更

解偷閒幾度來

賈村三首

浩浩長河去不回先生風采亦悠悠
戛嶼嶼古塚漫秋草日暮牛羊自下來

蘆葦蕭疎倚斷垣賈家猶有兩三村
鋤犁蓑笠紛紛去知是先生幾代孫

漲河秋水日渾渾獨放扁舟過賈村
記得塵沙厭爲客初浮清汴出都門

環翠軒

橫塘歸路尙閒關環翠軒中幾往還
山水祇應隨處好不勞回首白雲間

好是清風五月寒便教忙殺也盤桓
最憐池水荷花滿不與詩翁一處看

敏叔詩云來恨不逢池水滿屏風圍住芰荷香

橫塘集卷六

七

題平翠軒

簾捲清霜曉尙寒好峯重疊在闌干
登臨每恨青山遠今日青山枕上看

道旁人家小軒

方沼圓荷十數箇短墻新竹兩三竿
憑欄盡日猶無厭卻借行人一飽看

斗野亭

得得來尋斗野亭亭今已作鎮官廳
壁間多少新詩句見說當年聚德星

醉柳亭

憶在河間醉柳亭十年南北嘆漂萍
舉頭河上如相識多謝逢人眼更青

過西湖懷詹致一

憶昨籃輿出城郭靈芝軒檻共徘徊故人短棹今天末斜
日湖山我獨來

墜馬戲作

病軀自覺海天遙瘦馬誰教作意跳也是諸侯老賓客不
妨造物惡相撩

次韻張敏叔筠軒

蘭陵公子畱題後野草閒花變四時惟有此君猶好在年
年添得歲寒枝

孔顏畫像

亭亭一氣自渾淪藹藹和風與慶雲畫手千年聊寫似豈
知天未喪斯文

寄邱覺

時在天台

每欲扁舟老江海不堪五斗尙塵埃煩君且覓天台紙待

橫塘集卷六

八

取橫塘居士來

招琴僧

客心日日是塵埃寄語家山好在哉流水松風無夢寐誰
能特地抱琴來

戲遠大師

盧阜遠公眞好事白蓮社裏盡高才師今更不會沾酒底
事淵明日日來

淨光旻老儿上見呂少逸詩軸二絕

白髮龐眉一老僧埽除緣事室如冰案頭惟有新詩軸自
說風流令尹能

天涯此日逢周子海內今年得呂侯自笑種頑終不比可
憐迂闊暗相投

羅源護國院危簿以爲大類廬山因作兩絕句

石橋松徑人招提盡道分明是虎溪卻恨歸鞍太匆促不能月下聽猿啼

東林未到聞人說護國門前最逼真亦有遠公能好客他年同作社中人

資福清軒

偶過清軒坐餉時道人煮茗索題詩紅塵六月門前路疎雨冷冷滴小池

宿橫塘雨餘見螢感舊

一賦流螢二十年短篷還是未能眠此生擾擾何爲者寄語諸兒各勉旃

宿辯正

酒酣詩卷幾廣酬十載光陰一轉頭休聽空塔鳴夜雨何郎雙鬢不禁秋

橫塘集卷六

九

行之見招觀畫

喚我來看訪戴圖溪山慘淡雪模糊扁舟也待江湖去更有王維妙手無

乙巳五月十八日沈元鼎招飯昭慶登白蓮望湖樓汎舟過靈芝少憇孤山下七絕句

蓮社羣公跡已陳壁間詩句尙清新湖山俛仰成今古更好畱題遺後人

樓前湖水與隄平湖上周遭翡翠屏徒倚闌干聊寓目知公教我醉時醒

藕花亂點水中天小雨輕陰淡暮山試倩舟師連蕩槳要隨飛鷺過前灣

鳴琴餘暇卽湖山飛鷺傳觴縹緲間只恐雙鳧朝帝所不容長伴老人閑

幾年塵土客京華夢到西湖佛子家今日扁舟還似夢不
知流落在天涯

蘋末潭無向晚風湖光湛湛磨青銅平生何處要如許塵
垢從今一洗空

雨過孤峯濯翠鬢亭亭倒影夕陽間夷猶待看湖中月可
奈城門欲上關

經臣重九假馬同諸友登高

借馬登高日已曛一尊昏睡自相親可憐山奧無多地著
盡秋來沒興人

病告看看近兩旬登高一一聽諸隣佩莫誰是佩刀者落
帽多應落解人

經臣秋試失利時余在告

墨牛圖

一牛動是萬錢值墨指一作何紛綸安得田家真有此坐

橫塘集卷六

十一

令四海無饑民

出處由來祇一塗區區分別欲何如試看信手作毛角絕
勝當年陶隱居

橫塘

春日橫塘綠渺漫扁舟欲去重盤桓誰教向晚廉纖雨又
作殘春料峭寒

次韻戴人達遊靈隱

春來幾度過靈山不覺穿林錦籜斑可是人間未炎熱冷
泉終日自潺湲

左經臣觀湖閣見招有祇把清風召得公之句

週遮豈得吾徒事省淨還爲世俗嫌若把清風召人客已
應賽過水晶鹽

次韻江左司

長空翳翳本落處流水渾渾沙盡頭安得此身生羽翼
眼中長見釣臺秋

次江文韻

釣瀨沉沉月一鉤魚龍夜夜盡回江一作頭狂奴活計非公
意乞與江湖萬里秋

學道誰言百不憂欄干盡日倚樓頭須知橫雨千山暮不
比西風一葉秋

擾擾爭碁局與籌也知一著在前頭終朝下手渾無處爲
底無人問弈秋

請公早早泛虛舟多少行人在渡頭看取清風起蘋末片
帆歛過五湖秋

平生有志慕前修嘆息因循漸白頭端向歲寒看松柏始
知凡木不禁秋

橫塘集卷六

十一

溫嶺界上

嶺北無端去抱關嶺旁便是舊家山回頭試覓歸時路只
在行人頃步間

剡溪橋

去去來來今幾秋霜毛漸漸滿人頭東書匣劍平生事斜
日江山獨倚樓

歸自濱州

扶疎弱柳綠初勻啞咤黃鸝語未眞行路逢春渾不覺卻
須說似探花人

馬首石詩

世俗亦知千里遠卻將凡馬被雕鞍何人欲識眞龍種好
向巖頭仔細看

和朱深明

曾陪杖屨一作履古荆州十載光陰一轉頭擾擾紅塵長滿
眼峩峩三峴獨橫秋

當年一笑得英遊共弔沉碑漢水頭回首鹿門高遁去人
問姓字亦千秋

贈江左司

先生見告漢江上居士歸從庾嶺頭白日火珠無玷翳開
花野草是春秋

和經臣閣上思彥章

登賞猶前詩友俱不知趙子更來無暮天好處須同賦乞
與人間作畫圖

和江左司

新麥紛紛落磴時旋看片片作銀絲先生自足醒醐味惻
隱猶憐穉子饑

橫塘集卷六

七

西湖夜歸口占送李秦發

山上徜徉湖上歸月明千頃浸玻璃明朝有客朝天去多
少紅塵在馬蹄

戴俊秀才需堂

客到需堂日已曛從容樽酒話情親欲來卻去知何事笑
殺當年訪戴人

清陂堂

簿領他年解印歸尙憐江上子魚肥扁舟不學鷓鴣子只
要清陂作釣磯

午枕敲時睡思遲含風百頃碧琉璃人生適意當如許莫
遣塵埃外客知

取次題詩畱屋壁從他傳唱落漁家禪翁好事還堪笑在
卻青青一尺紗

過吳子厚和醞楊時可壁間新句

主人還往多佳客小閣逢迎不計時
薰甲一盃梅福醉揮毫半壁子雲詩

題紫霄院壁

院有茶山

雪消谿谷已含春雷動槍旗一簇新
解道人間最仙景風流無復杜陵人

望湖樓示世厚

樓頭滿眼是湖山瑟瑟清風燕坐間
三伏長塗走塵土他年記取此時閒

寄盧中甫四首

霜風獵獵動旌旄月落天低錦帳高
旋放洮河三尺水洗磨十萬血腥刀

九月都門風薄衣夜碓聲裏鴈南飛
野人不識長安樂且

橫塘集卷六

七

趁鱸魚一棹歸

朝米暮鹽何日休塵埃滿面霜滿頭
草堂竹閣歷秋水幾時和月弄扁舟

制勝關頭雪未融崆峒山下又春風
此身不及涇川水漾

絮飄花日向東

寄筆墨紙兄長絕句三首

最憐修貢自衮岷拜賜中天雨露新
好爲先生載嘉句卻愁紙價湧京塵

潘生地下骨應朽妙技猶藏天府中
刀筆未應當好賜不如分付與詩翁

刑名去取漫忉忉慚愧官家五色毫
老矣弟兄無用處只

應警銳屬兒曹

寸碧亭

此詩據東園詩集增入

杖履尋常行樂處不論小徑與幽亭誰知蒼莽千峯外尙
有仙山一點青

橫塘集卷六

十四

宋 許景衡 撰

制

越王偁第八男乞特賜名可除右驍衛將軍制

朕惟祖宗明帝堯之峻德以親睦九族積周家之忠厚而本支百世慶流王邸克生多男肇頒爵命以爲爾寵蓋有國之常典非近屬之私恩矧吾叔父僉謂大雅之不羣宜爾諸子咸知爲善之最樂往服訓辭永綏福履可

越王偁第十二女可宗姬制

勅眷吾叔父爲時賢王集餘慶於祖宗盛鍾愛於閨闈爰稽邦典載錫恩章爾性稟靜貞習知淑慎服姆師之訓見於夙成閱圖史之規庶幾克踐益崇懿德允協令名尙體眷懷永綏祉祿可

橫塘集卷七

宗子安止正任觀察使制

勅漢唐宗室子智略類有可稱者而朱虛江夏折衝禦侮卓然不羣著在史冊後世稱慕焉具官某於皇家爲近屬於環尹爲顯位而能持心樂易志在有爲比緣寇攘乘城捍守有夙夜之勞有司奏功朕用汝嘉進陟廉車是爲異數其益自勵於忠勇庶幾無愧於古人可

通直郎向子辰除右衛將軍駙馬都尉制

勅具官某周詩之美王姬能致肅雍之化唐室之尙公主必求文雅之流惟我國家稽古典禮若時下降宜舉舊章以爾天資粹溫人物秀整凡今故相孰如文簡之一門訥慶後昆時乃欽聖之餘澤擢居築館式重國姻進秩副車參官環衛其益思於兢慎尙永對於恩榮可

向子辰除正任刺史駙馬都尉制

勅婚姻以時二南以基王化夫婦有義五典以敘人倫屬嘉禮之告成疏茂恩而進秩具官某風姿凝粹器宇靖深生於勲德之門習知詩禮之學眷貴主之下降涓穀且以有行爛然車服之儀申以爵祿之寵粵從環尹遙總守符進以才能當知選尙之意宜爾家室允資德義之修往服訓辭益光時譽可

陳邁中山路安撫使制

勅師克在和方慎鎮綏之寄人惟求舊益隆注倚之私乃眷老成申頒優渥具官某早以風幹寢被簡知敦卻穀之詩書游分闔寄師畱俟之智勇灼著戰功屹若長城護我方面屬茲易地還益舊封州循兵民謹守疆圉繄爾中山之重寬予北顧之憂可

李邈依舊眞定安撫使制

橫塘集卷七

二

勅自金人內擾河朔用兵多士獻言莫先擇帥朕惟用人在乎因任泛舉不如求舊於以底績不亦優乎具官某以孝爲忠寓文於武出守關塞持節西河威名灼著邊人信服比膺柬求分闔全趙易鎮定武乃以親名自列避而勿居是用申命俾仍舊服維我祖宗善馭將而漢班超則善守邊撫育將士綏靖疆場使敵人畏威而遠遁惟爾勉之益勵乃節可

郭奉世除集英殿修撰制

朕惟盜賊竊發或稽天誅若守將得人則凶徒必獲以爾奉世早以吏能見推多士出守高密政績可觀比者逋卒狂悖侵擾吾民爾能提兵乘時掩擊斬獲之多至於千數威名暴著達於予聞論撰集英士夫高選不獨旌爾之勞烈且以爲四方守臣之勸焉益究壯猷以俟褒陟可

商守拙除直顯謨閣制

朕惟河朔比懼寇攘若守將得人則兇徒自潰以爾守拙精於刑名之學夙有平反之譽出臨便郡施設可觀屬盜賊之竊發嚴壁壘而固守躬冒矢石至傷體膚而能裹創督戰以全吾圉載惟忠盡良極嘆嘉其進直於西清以表勸於北道勉惟竭節嗣有寵褒可

郭攻陝西轉運副使兼制置解鹽使制

勅具官某解池滋息實佐邊費迺者任非其人公私告病肆求能吏俾經理之爾攻早以風幹屢更使指蔚有望實稱於搢紳其以冊府論撰之職往副關陝漕輓之事凡鹽澤之盈虛貿易之政令惟爾精講而力行之使商賈流通邦計給足時乃之職可不勉哉可

許高可閤門宣贊舍人制

橫塘集卷七

三

勅具官某贊朝儀於宸閣總憲禁於一路厥惟能吏乃堪是選爾有幹材重以勇果自河以北今以命爾訓練民兵驅逐盜賊使疆場無擾而閭里妥妥安爾之職也往其懋哉可

知威勝軍張堯佐可閤門宣贊舍人制

勅具官某金人內擾綿上闕守爾初臨孤壘安集驚擾之餘僉謂有勞宜膺褒寵夫贊儀上閤而剖符邊州亦武士之高選也益懋勤績以對恩榮可

劉鈞除閤門宣贊舍人制

勅具官某贊儀上閤武選之要職也朕所慎擇今得其人以爾鈞名將之子能守家法乃者賜對便朝敷奏詳明俾踐厥次是爲優寵益思自勉以稱簡求可

劉衍宣贊舍人制

勅具官某贊儀上閭武士之要選爾以智略見稱流輩今以命爾往參戎幕尙其自勉以趨功名之會副朕超擢之意欽哉毋忽可

朱靖等授官制

勅某等爾等各以勇鷲早隸軍籍積年有勞易官班祿往承新命益務忠勤可

俞平等授官制

勅酒醴之政付諸有司爾等各以恪勤遂膺初命賞則優矣往其勉哉可

靳澤等授官制

勅爾等宿衞有年各能不懈以及入官之格其祇初命益務忠勤可

劉珪轉兩官制

橫塘集卷七

四

勅具官某邊臣無守禦之備乃欲棄捐堡砦爾能固護以全吾圍其功可錄矣進官二等以爲爾寵往惟欽哉可

倪臯等各轉一官制

勅具官某等酒醴之政付諸有司爾等各率乃職訖事無曠進官一等以旌爾勞往服欽哉益思來效可

時孝悌轉一官制

勅具官某爾祇役於官服勞良久進官一等以錄爾勤往其懋哉益圖報稱可

蔣祖師等轉官制

勅具官某爾等莅職外府能佐而長剡奏來上請錄爾勞進秩茂恩往其祇服可

朱革轉兩官制

勅具官某爾頃爲帥屬從軍兩河今錄爾勞進官二等往

其祇服益懋忠勤可

成忠郎賀注轉兩官制

勅具官某捕寇尉職也能盡其職則懋功之賞朕亦何愛焉乃者青寇嘯聚林莽爾能掩獲以靖里閭進官二等以爲在職者之勸可

崔廣等轉官制

勅具官某頃者金人侵擾邊壘爾等咸奮忠勇一掃兇殘兵民帖然良以爾等能自竭也或進職上閭或增秩一等以寵爾勞益思戰守之力尙有殊恩以俟後效可

修武郎趙思道轉官制

勅具官某迺者西戎擾塞下爾能自奮斬首卻敵宜從進秩以旌爾勞可

祈立等轉官制

橫塘集卷七

五

勅西戎犯順邦畿繹騷爾等各奮忠勤血戰卻敵奏功第賞超進厥官往膺不次之恩益勵無前之勇可

王子玘等轉一官制

勅具官某等羌戎犯順侵軼邊陲爾等身先士伍各有斬獲進官一等以賞爾勞益勵忠勤以俟褒顯可

李忠等各與轉官制

勅具官某戎騎侵軼爾等各有斬獲之功進秩之恩以爲爾寵往其欽哉可

奉議郎宋晟轉一官制

勅具官某爾能修戎器部民兵以守衛王畿其勞亦可錄矣進官一等往惟欽哉可

向齋轉官制

勅具官某王師出塞□□巢穴爾能力戰有功行間褒進

爾官以爲將士之勸可

王鄧等轉一官制

忠以衛上人臣之節賞以勸功有國之權故高爵厚祿非以苟私貴昵亦視其功之如何耳具官某早隸仕籍久於器使或祇事上閤或列職禁省恪恭匪懈蔚有能稱比因軍興區處纖悉有夙夜之勞進官一等爲爾輩寵各殫乃心以圖報稱可

茹端轉官制

勅具官某爾以勇果從軍禦寇累功議賞併進厥官往其欽承益務報稱可

劉良弼等轉三官制

勅具官某等賊騎犯順邊陲繹騷爾等各提孤軍力戰拒敵功未就而忠有餘使者以聞朕用嘉嘆進官三等以旌

橫塘集卷七

六

爾勤往究壯圖以對殊寵可

全端夫轉官制

勅覃慶滌澤實均在服而爾兄以改授爲請於以見友恭之義不從厥志往服茂恩可

郭彥章等轉官制

勅具官某等迺者愚民嘯聚山谷爾等各奮忠勇俾卽就擒今部使者列上功狀進官一等以旌爾勞往服寵榮益思報稱可

權南豐巡檢高騰因本寨兵級聶成等作亂劓殺淨

盡轉一官制

勅具官某卒驕倡亂威不素行非一日之積也錄爾倉猝弭亂之功而略其不素調整之罪可謂厚矣進官一等其

克欽承可

馬肅轉一官制

勅爾等各以勇果從事戎行簡募土豪襲擊寇賊載嘉勤績進官一等益著來效以俟茂恩可

武德郎張仙等各轉二官制

勅具官某軍校狂悖驚擾兵民汝等各能掩捕俾卽伏法進官二等以旌智謀往其懋哉益思後效可

湯材等轉一官制

勅具官某賊騎侵軼爾等各有守禦之勞有司奏功進秩一等勉修職業以稱恩榮可

鄭宗孟轉官制

勅具官某齊寇竊發屬邑騷然爾率卒徒多所斬獲併進爵秩以錄爾功往惟懋哉尙思來效可

孫世詢等轉三官制

橫塘集卷七

七

勅具官某逋卒狂悖侵擾旁邑爾等各能率先士伍破其巢穴剪除醜類並著戰功超遷三官是爲殊寵益懋勇忠以對恩榮可

劉之才轉三官制

勅具官某逋卒狂悖井邑騷然爾能躬帥其徒乘時斬獲奏功來上超進三官益務忠勤尙有褒寵可

龍安等轉官制

勅具官某爾等皆隸兵籍比緣脅從陷於非義而能以忠勇自奮料率其徒屏除首惡初雖失道卒能自新功罪相除朕不終棄或擢居朝列或躡進武階益思勉勵以報不次之恩可

高景雲轉官制

勅具官某文武一道也而或不能兼焉者非才不足學不

至耶以爾景雲早以詞藝聞於摺紳冊府宰屬更踐滋久
出守北州屬有邊警忠義不懼惟道自守捍禦有方卒固
吾圉錄功進秩以寵爾勞往其勉之以爲文武全材則朕
汝嘉可

王雄等轉官制

勅某官屬者逋卒侵擾冀方爾等能率其徒屏除斬獲奏
功第賞各進爾官以爲忠勇之勸可

王彥轉一官制

勅具官某爾以彊勇躬督士伍剪除醜類以靖邑境進官
一等用旌爾勞往服恩榮益勤乃職可

全淵轉一官制

勅具官某爾等列職禁省屬當軍興招置強勇部勒衛從
有夙夜之勞第功來上進官一等以寵爾勤往惟欽哉以

橫塘集卷七

八

圖來效可

董士良轉官制

朕仰遵祖宗成憲刊正官制以祿左右之臣恩數寵章於
是爲稱以爾士良從事禁闈恭謹不懈涉時久矣累官至
是抗章有稱願從彝制勉服新渥益思所以爲報者可

張公濟等各轉一官制

勅具官某爾以彊勇射藝絕倫進官一等以爲武力之勸
往其欽哉可

士琛等轉官制

勅齊寇犯順侵擾畿甸軍書奏報汝等有勞第功進級往
其欽哉可

康弼轉一官制

朕初嗣位均澤海內進秩文武之士以同邦家之休具官

某早以恪勤官於禁省祇事率屬蔚有能稱推此茂恩遷秩一等益思矜慎以對寵榮可

孟濤轉官制

勅具官某爾祇役樞府實掌軍書積日有勞宜推懋賞往勤乃職以稱所司可

趙昇等轉官制

勅具官某爾等各以武力宿衛有勞射藝中程宜膺懋賞併進祿秩往惟欽哉可

趙明誠轉一官制

勅逋卒狂悖驚擾東州爾爲守臣提兵帥屬斬獲爲多今錄爾功進官一等剪除殘孽拊循兵民以紓朝廷東顧之憂惟爾之職往其懋哉可

曹格等轉官制

《橫唐集卷七

九

勅逋卒狂悖驚擾東州爾等能率其徒頗多斬獲併進爾秩以寵忠勤往惟懋哉以稱優渥可

劉士通等轉兩資制

勅具官某頃者元帥總戎河朔爾等有軍書奏報之勞各命以官往其祇服可

張燾宣敎郎制

勅具官某往者狂寇侵軼近郊爰命樞臣總守衛之役而爾實預幕府贊畫居多今錄爾功申命進秩然爾方官中祕涵養器業以須世用則褒延之寵實肇自茲往惟懋哉以稱朝廷期待之意可

林朝佐可承節郎制

勅具官某爾攝事遠邑督捕羣盜有司議賞進易武階往其欽承益務忠勇可

李忠等補承信郎制

勅具官某金人內擾軍書奏報爾等有勞各命以官往其
欽服可

郭元明補承信郎制

勅乃者連卒迷而不復爾能道朝廷恩意俾之悔罪自歸
有司今錄爾勞命官初等往其祇服益思報効可

南景仁可承信郎制

勅具官某爾以勇果從軍兩河畢事奏功宜膺初命祇服
寵獎益務公勤可

孟涓等並合轉承信郎制

勅某等樞臣總戎鎮撫北道爾等各隸帳下有奔走之勞
往服初命益務忠勤可

劉懋致仕合換武節郎制

橫塘集卷七

十

勅具官某爾以恭慎列職禁省茲緣疾憊辭榮而歸易秩
武階永綬壽嘏可

何志同復顯謨閣直學士制

勅朕纂受丕基均澤四海乃眷在服槩沾褒進之榮矧吾
邇臣宜申敘復之命具官某天資豈弟世濟忠嘉早被眷
知進履華近比坐過誤既闕歲時宜從曠思稍還舊物雖
外司於真館尙益勵於遠圖可

吳執中追復述古殿學士制

勅示好惡以正風俗錄往善以勸來者此爲政之大方而
今日之先務也具官某有通變之才有特立之操博聞精
識洞達當世之務忠言讜論不撓羣枉之間受知先皇再
執邦憲排擊奸慝杜絕濫恩謂內侍擅權將有意外之憂
而新邊置郡徒耗海內之力至於花石之糜費後苑之淫

巧慨然指陳多見開納雖清議所共與要直道之弗容乃從左遷未幾淪謝精忠凜然不泯當宁久而益思肆朕臨御屬茲艱難覽明哲之建言若著龜之先兆是謂三代之遺直獨嘆九原之不作宜尊渥澤追復祕殿英爽不昧服此恩榮亦使有志之士知朝廷之於賢者猶不忘於泉壤也可

宋伯友復官制

勅過嘗有罰類從左授計期而還其官者哀矜之令典也矧在邇列其可後乎具官某早以時望久於器使更踐省寺進登禁途平反庶獄有忠厚之譽詿誤降秩亦既累年俾復舊次是謂茂恩其體予寬宥之意所以施於汝者以之讞疑則刑清而民服矣尙勉之哉可

周武仲復官制

橫塘集卷七

七

勅具官某朕臨御之初均澤海內褒進文武之士俾同邦家之休矧吾邇臣敘復之寵獨可後乎以爾比由時望踐更器使司刑中省執憲南臺蔚有能稱著於士論坐法左授亦既累年屬茲慶賚悉還祿秩祇膺新渥益勵後圖可

趙子直復職制

勅具官某朕初臨御大賚天下無有疎昵咸被渥澤而况嘗列侍從者乎以爾宗室之子幹敏有稱頃坐過差鐫職次對屬茲覃慶宜賜寵章論撰冊府嚴奉祠庭是爲異恩往其祗服可

盧益等復職制

勅朕纂受丕基大賚四海褒進文武之士俾同邦家之休矧在邇聯宜膺寵敘具官某早以時望揚於禁塗比隸刑書載更歲籥茲從新渥一洗宿愆其還西清次對之班尙

仍東州拊綬之寄勉服異數益廟遠圖可

檀倬張志胡松年李璆高伯振復職制

勅具官某朕嗣位之初均澤海內褒進文武之士俾同邦家之休矧在邇列宜膺寵敘以爾早被識擢亟踐華要持橐禁路掌制詞掖坐法左授亦既累年屬茲新渥一酒宿負論撰祕殿嚴奉真祠是爲殊恩往其祗服可

方孟卿張動等落職制

勅具官某轉輸六路以給中都常選才臣庶幾協濟爾等各以時望屢更煩使而處畫乖刺濡留道塗舟師散亡米粒朽腐豈不重負朕任屬之意哉宜罷直閣尙仍漕事毋忘省循以補過自効可

余深落觀文殿大學士依前特進致仕制

勅附下閣上久鬱人言置散投閒用伸邦憲不獨爲人臣

橫塘集卷七

十一

之常戒抑以示天下之至公具官某比以時名驟膺器使宜盡瘁以體國乃懷利以事君附麗要權樹植黨與言路抗疏觀望風旨而橫肆中傷詔獄窮姦灼見邪慝而陰爲道地訖從羣枉更踐要塗參預政機進登宰席苟得尙容於居位不祥莫大於蔽賢凡所選除皆由請囑寧復顧於公論唯知報於私恩當軸處中所操如此庇民尊主斯言謂何亦既罷歸尙存體貌擁節旄於將閫優餼廩於祠庭爾則擅以爲榮人皆憤其非據茲覽引年之請亟推從欲之仁而宿負益彰清議弗置姑鑄顯職俾卽安居朝廷保全之恩於汝厚矣臣子省循之念尙其勉哉可

李丙落徽猷閣待制制

勅彰善癉惡以清風俗此有國所常行而今日之先務也具官某早以文藝荐被任使不能自持比麗元惡雖竊一

時之寵而抱無窮之悔比嘗拔拭畀以中權而宿愆益彰公論弗貸鑄職延閣往司祠庭尙爲寬恩毋忘內訟可

李仲詢特落致仕差知濬州制

勅具官某以爾廉幹試吏有年膂力未愆遽爾謝事眷惟濬州宜得良守大臣僉謀以汝名聞亟從退閒往踐厥次撫兵民備守禦汝之職也尙其懋哉可

周敦禮等仍授職制

勅具官某爾等引年告狀筋力未衰再錫官榮還隸仕籍各勤乃職以對茂恩可

翁彥國落徽猷閣直學士制

有功則見知過皆則必罰此天下之至公也雖在邇列朕不敢私焉具官某有政事之才有鎮撫之譽更踐中外閱日滋久將漕六路宜優爲之而舟師散亡米粒腐敗豈措畫之弗早抑佐屬之弗力耶其鑄西清次對之班尙仍東南餉饋之寄益圖後效以稱寬恩可

黃鏐落直徽猷閣制

勅具官某士以廉潔自持而以勤瘁事國庶幾無負於名教爾持節一路則以黷貨媚權貴贊畫幕府則憚勞而莫肯行雖爾善自爲謀而朕獨安取此延閣清切非爾所宜居也斥歸銓部往務省循可

皇甫僅降宮祠制

勅子之能仕父教之忠厥或不恭宜誰之責具官某祇事禁省有年於此而羣小妄議旣抵邦刑爾爲其父獨無失教之罰耶露章自劾姑示矜容斥從外官俾司真館是爲寬典無忘省循可

翁彥國等特降兩宮制

勅具官某東南歲漕六百餘萬以給中都祖宗法度纖悉備矣有司能率而行之則爲稱職以爾等各以吏幹見稱多士肆朕推擇俾使六路而措置或戾於法漕舟濡滯米粒朽敗亦旣薄罰而論者不汝貸也降秩二等以責來效惟爾勉之以求合於祖宗成憲則朕豈以一眚掩爾善耶欽哉無忽可

武功大夫王宗禮降兩官制

勅具官某爾列於有司而徇私託疾以曠厥職此法所不容也姑從降黜以警在位毋忘循省庶幾補過可

黃澤等降兩官制

勅官各有守若皆徇私託疾則有司之事廢矣可無罰乎且官某等各以勞能踐更煩使謂宜盡瘁周旋厥職乃以病論至於再三苟可彊勉於公室何至誑欺而蕪免降秩兩等不獨小懲且以警夫在位者可

橫塘集卷七

十四

杜宣降官制

勅具官某職教事而士卒偷惰射藝弗中程式宜誰之責也薄示降黜往其省循可

張見道等降官制

勅具官某比詔有司窮治僥倖籍其貲產以正邦憲爾等方命漫弗欽承屬更赦宥姑從降秩之罰尙其省循毋重後悔可

宋喚責授單州團練副使永州安置制

朕昭示好惡大判淑慝悉屏姦巧投畀夷裔不獨少清於仕籍庶幾大正於邦刑爾以浮薄之資席世家之舊粵從卑冗依憑親黨出守節藩入貳禁省華除要職談笑得之比緣奏稟稱造語言敢爲面謾且陳己力徇私背公嗟爾

何至於此以無爲有聞者爲之憤然向覽彈章姑從薄責而公論未允言者弗置其以散秩斥之荆蠻服我寬矜毋忘循省可

范夙特贈朝奉郎集英殿修撰制

勅具官某士之進說有忽於當時而見思於後日黯黜於平生而顯白於身後者固多矣念非錄其往善則何以爲後來之勸乎以爾爲大臣子篤學好直憤宦者之出使緣橫歛而爲姦慷慨有陳卒以貶死聞者惜之比朕臨御亟誅首惡慚然興懷優爾卹典論撰祕殿士夫清選爾尙不昧知遺志獲伸當釋然於泉下矣可

曾燾贈官制

人臣死難朝廷卹典自一命以上無遺者矣又况於親近者乎某官祇事禁省有年於茲捍寇乘城死於驚擾贈賻良渥以寵忠勤尙其有知服此休命可

橫塘集卷七

十五

唐度祖母周氏特贈建安郡夫人劉氏特進建康郡夫人制

勅國家有大慶則士大夫皆得敘封其親其於爵尊位重則褒寵有至於再世三世所以加惠臣下而同其福祿者不已厚乎此近古所未有也具官某祖母某氏躬有懿德作嬪慶門克相其夫以氣節自重辭榮早歲養高邱園積厚之施乃在諸子知名當世更踐要塗亦有爾孫以守邊鎮粵從小君進封大郡尙惟不昧以享此休顯之明命可

父文贈開府儀同三司制

勅孝子之事親也生則有養沒則有祭而國家之於多士自通籍以上則又有追封之典焉蓋方責其盡忠之效則徇夫罔極之報者曷可已哉某官父某詞藝之學政事之

林更踐中外茂者風績未究施設奄爾殂謝乃克有子銜
訓嗣事司吾邊鎮有守捍之功敘贈之秩已躋二品茲用
申命進同三司所以爲泉壤之榮者極矣則爲其後者可
不思稱所蒙哉可

母何氏特贈榮國夫人制

勅凡人富貴其身則思顯其父母而國朝敘贈之典非獨
爲死者之寵亦所以慰夫生者之情也某官母某氏生於
令族克配君子闔德之懿寶昌其家惟時慶嗣爲國連帥
褒崇之命進封大邦尙惟淑靈享此休顯可

故妻王氏特贈太原郡夫人制

勅士之有勞於朝廷則不獨爵命其身而又褒崇其家室
故雖已往亦預斯榮焉某官妻某氏溫柔靜專來媿慶闕
不幸夭折弗終顯榮其以小君追昇大郡尙克有知享此

橫塘集卷七

六

休寵可

妻劉氏可彭城郡夫人制

勅周衰法度廢名稱浸訛孔子患之爲正名焉故邦君之
妻謂之夫人稱諸異邦則曰小君然非有懿行亦何以稱
此名哉具官某妻某氏婉婉溫恭聞於族姻作配巨室克
主饋事進封名城以正小君之號尙其祇服對此稱榮可
鄭成之故妻王氏贈越國夫人制

勅國家有大慶敷錫天下不問疎昵存沒咸被渥澤又况
於戚里之近屬哉具官某妻某氏柔靜溫恭茂著閭德嬪
于慶閭問譽藉甚降年不永弗究顯榮進封大邦以貢泉
壤淑靈不昧尙克享此休稱可

席貢母趙氏特贈燕國夫人制

勅觀其子之賢否則知其父母之所積而朝廷追榮之典

亦因其所積之厚薄以爲爵命之崇卑具官某母某氏生於令族蔚有淑聞來嬪慶門實昌其家克訓諸子爲時聞人持橐禁塗分闔帥路追榮之恩嘗啓大國茲用申命改封全燕尙其有知以享此休顯之報可

